

Apocalipsis

Ndayá quem librěsañe yomna

¹ Quemuentše entsábemana ndayá Běngbe Bětsá Jesucrístbioye tbojaninŷinŷé, chě Běngbe Bětsabe oservéněnga cha cháuinŷanŷema, ndayá jopásama yojtsobecuama chěnga chamotsetatšěmbuama. Jesucristo chama chabe ángel tbojichmó, chě soyěngama atše, Juan, chě Jesucristbe oservenábioye chašuinŷinŷema.

² Y atše sěnjayana lempe ntšamo ndegombre yomncá lempe chě tijinŷe soyěngama, chě Běngbe Bětsabe buayenana soyěngama y chě Jesucristo šonjanianana ndegombre bétsemna soyěngama.

³ Oyejuayá nda tojtsalía, y oyejuayěnga nděmuanŷěnga botamana tmojtsuenana quem yochjopása soyěngama, chě muentše entsabemancá ndegombre tmojóyeunanga, er chca jopasa tempo entsobeco.

Asia luaroca ošbuachiyěngcá enefjuaněnga jacheuayama

⁴ Atše Juan, sěntsabiamná chě Asia luaroca canŷsěftañe ošbuachiyěngcá enefjuaněngbiana. Atše, Běngbe Bětsá sěntseimpadana, tšabe bendicioněnga chábiocana chašmosháchiñe y ainaniñe puerte tšabe ebionana chašmotsebomna, Běngbe Bětsábentšana, chě canŷsěfta espíritěngbentšana y Jesucrístbentšana. Běngbe Bětsá, chě mora endmėná, enjamná y sempre echantsemná;

chë canyŕsëfta espíritënga, chabe uámana puesto natsanoica mondmënënga;

⁵⁻⁶ y Jesucristo, chë ntšamo Bëngbe Bëtsabiana yotatšëmbcá ndegombre oyebuambnayá, chë natsaná ndabiana Bëngbe Bëtsá tojama obanënguentšana cháuatayenama, y nyetsca quem luarentša mandadëngbe amëndayá. Cristo šondábabuanyëshana y bëngbe bacna soyënguentšana šojatsebacá, cha tonjanóbanayeca, chabe buiñe juabuáshanëse. Cha tojama bënga chamotsobena cháftaca jtsemándayana y uámanënga chamotsemnama, y Bëngbe Bëtsá chabe Taitá mo bachnangcá chamotseservénama. ¡Nyetscanga nyets tempo chamotsinýanýná Cristo puerte bëtsá y uamaná bëtsemnama y obenana nyetsca tescama yobomnama! Chca chaotsemna.

⁷ Mouenënga. Cristo jantšetëshënguñe echanjésabo.

Chábioye nyetscanga mochanjinýe, chë tmonjancrucificágnaca; y quem luarentša nyetsca entšanga puerte ngménaca mochántsemna y mochantsošachna chábeyeca. Ndegombre, chca chaotsemna.

⁸ “Atše sëndmëna chë nyetsca soyënga bojatšayá y pochocayá ca,” Bëngbe Utabná Bëngbe Bëtsá tojayana. Cha chë sempre endmëná, enjamná, nyets tempo echantsemná, chë nyets obenana bomná.

Juan mo otjenayoquëcá Cristbiana tojáninýe

⁹ Atše Juan, Jesucristbeyeca tšëngaftangbe catšata, cháftaca cánýiñe mo canýacá bëtsemnama, cach tšëngaftangcá sëndëpadecena, tšëngaftangcá

chanjěftsashjache Běngbe Bětsabe aměndayoye jamashěnguama, y tšěngaftangcá Běngbe Bětsabeñe jtsobátmaněse, uantado sěndmėna chě padecena soyěnguiñe. Běngbe Bětsabe palabra sěnjánabuayiynama y Jesusbiana ntšamo ndegombre endmėncá sěnjanoýebuambnama, atše šmonjetsanětsena mar bėjayoca canye fshantsentše, Patmos ca uabáinoca.

10 Y tonjanopasá, canye tmengo, chě ošbuáchiyěnga Běngbe Utabnábioye cányiñe jětschuayama te, atše sěnjanoquedá chě Uámana Espíritbeyeca corente mandaná, mo otjenayoquēcá soyěnga sěnjětsonyaye, y atšbe stětsoica canye jabuache oyebuambnayana sěnjanuena, mo canye trompetěfjua cuafjuajatětcá;

11 měntšá šontsanatsětsná: “Canye librěšañe mábema lempe ntšamo contsonyacă y cochjuíchmua chě Asia luaroca canysěftañe ošbuachiyěngcá enefjuaněngbioye: Efeso, Esmirna, Pérgamo, Tiatira, Sardis, Filadelfia y Laodiceoquěngbioye ca.”

12 Sěnjanoúertana jinýama nda chca šojtsanatsětsná, y chca sěnjánma ora, sěnjáninýe canysěfta castellano candelerěšěnga;

13 y chě canysěfta castellano candelerěšěnguiñe tsěntsaca canya sěnjáninýe, mo entšacă inýná, canye bėn entšayá uichětjoná, y cochóntscoca canye tětšća castellano uasnanějaca.

14 Chabe stjěnashana uafjantsěsha, puerte uafjantsěsha mo canye oveshabe boboshěshacă, y chabe fšněbenga mo iñeshcá enjětsinýna.

15 Chabe shecuatsěnga enjětsebuashinýinýana mo

bronscá, ndaybé natsana iñējana tcojuchnēngo enabé chaotsemnama y chentsana entšējuaca becá tcojajojó corente chaotsebuashinŷinŷanama; y chabe oyebuambnayana jabuache enjétsenana mo bētscá bėjaye cuaftsebuachquēcjanca.

¹⁶ Chabe catšbioica cucuatšiče enjétsatbēna canŷsēfta estrellēnga, y chabe uayoicana enjétsobocana canŷe espadēja, nŷets utoicajana puerta efsánēja, y chabe jubiá tša enjétssebuashinŷinŷana, mo chē shinŷe corente, lempe ntšamo tojobenacá tojtsebuashinŷinŷana orcá.

¹⁷ Cha sēnjáninŷe ora, chabe shecuatšentše mo obanacá sēnjánshajaye. Pero cha, chabe catšbioica cucuatše átšbeñe jajājuase, šonjaniyana: “Ndoñe matauatjana; atše sēndmēna chē nŷetsca soyēnga bojatsayá y pochocayá,

¹⁸ chē sempre vida bomná. Atše obaná sēnjamna, pero mora nŷetsca tescama vida sēntsebomna. Atše obenana sēndbomna, y chē obenánaca entšángbioye ndoñe quenátamna infiernoca nŷetsca tescama castigánēnga jtsemnana, mo nŷets tempo cuaftsobanca.

¹⁹ Ntšamo tconjinŷcá mábema, chē quem tempo endmēna soyēngama y chē más chcoye echántsemna soyēngama.

²⁰ Mēntsá endmēna chē atšbe catšbioica cucuatšiče tconjinŷe canŷsēfta estrellēngaca y chē canŷsēfta castellano candelerēsēngaca: chē canŷsēfta estrellēnga montsinŷinŷná chē canŷsēfta ošbuachiyēngcá enefjuanēngbeñe chamotsemándama uámana ichmónēnga, y chē canŷsēfta candelerēsēngna chē canŷsēfta

ošbuachiyëngcá enefjuanënga.”

2

*Efesoca ošbuachiyëngcá enefjuanënga
jábuayenama*

¹ Mëntsánaca cha šonjaniyana:

“Mëntsá mabobema chë Efesoca
ošbuachiyëngcá enefjuanëngbeñe chaot-
semándama uámana ichmonábioye:

Mëntsá entsichamo chë chabe catšbioica cu-
cuatšíñe canýsëfta estrellënga entsatbëná y chë
canýsëfta castellano candelersënga luarëjana
entsaná:

² Atše lempe sëndëtatšëmbo ntšamo
tšëngaftanga šmoyenana; atše corente
sëndëtatšëmbo tšëngaftanga jabuache
šmotrabájama, y ntšamo tšëngaftanga Bëngbe
Bëtsábeñe jtšobátmanëse šmnétsauantana padecena
soyënguiñe šmojtsemna ora. Y átšnaca
sëndëtatšëmbo tšëngaftanga ndoñe šmontsobena
jtšëuantánana ntšamo bacna entsanga tmojtsamcá.
Atšnaca sëndëtatšëmbo tšëngaftanga yejuana
šmojarrepará y becá šmojenojuabó jinýama
chë Jesucristbe ichmónënga imomna ca
tmojtsichamëngbiama; pero ndegombre chënga
ndoñe chca quemátsmëna; y chca šmojámayeca,
tšëngaftanga mora šmontsetátšëmbo chënga
bosterënga imomnana.

³ Padecena soyënguiñe becá šmojoboyá
y chca ora, Bëngbe Bëtsábeñe šmobátmana.
Chë soyënguiñe šmojasufri, tšëngaftanga atše
šmoservénama; y tšëngaftanga chca šmondëserveda,
ainaniñe añemo jtšebomnana ntjajbanacá.

⁴ Pero canje soye sentsombona tsengafangbe contra jayana: Tsengafanga mora ya ndone cachca bonshana que smatsbomna ni atsbiana ni nyetsca entsangbiana, ntamo atsbeñe jtsošbuachiyama smonjanbojatsé orca.

⁵ Menójuabonga ntamo chē tempo smonjanbobonshana, juabnayana motrocanga y cachiñe smochtsama ntamo chē atsbeñe jtsošbuachiyama smonjanbojatsé orca. Ndone chcase, atse tsengafangbioye chanjá jabuache jetsacastígama, jtsapochócantscuana, mo chē tsengafangbe cuenta entsemna candelere chabe puentensana cuaftsejuanacá. Chca chanjama, tsengafanga juabnayana ndone chašmonjatrocace.

⁶ Pero tsengafangbe pavor quem tsabe soye smontsebomna: Tsengafanga smonduábotena lempe ntamo chē nicolaíta ca uabaina entsanga tmojtsamcá, ndayá atsnaca senduábotena.

⁷ Chē jouenama tmojtsobenenga, chamouena ndayá Espiritu chē ndayenache ošbuachiyengcá enefjuanenga yojtsetsetsnacá. Chē padecena soyenguentšana tsabá chamojábocana mo ayenjanayengcá, chengbiana chanjama chē nyetsca tescama yomna tsabe vida chamotsebomna, y chca chenga mochántsemna mo chē nyetsca tescama yomna tsabe vida jtsebomna betiyeshentsana cuaftsesacá, chē entsanga sempre oyejuayenga mondbetsemnoca ca” –cha šonjaniana.

Esmirnoca ošbuachiyengcá enefjuanenga jábuayenama

⁸ Měntsánaca cha šonjaniyana: “Esmirna bėts pueblentse ošbuachiyěngcá enefjuaněngbeñe chaotsemándama uámana ichmonábioynaca měntsá mabobema:

Měntsá entsichamo chě nyetsca soyěnga bo-jatšayá y pochocayá, chě tonjanobaná y ndabiamama Běngbe Bětsá tonjama cháuatayenama:

⁹ Atse sěndětatsěmbo tšěngaftanga tša jabuache šmojasufrima y ndbomnjěměnga šmognama, pero ndegombre Běngbe Bětsábiocana bėtscá tšabe soyěnga šmondětsóbomñe. Y sěndětatsěmbo tša bacá tšěngaftangbiamama mondoyebuambná chě judiěnga imomna ca icháměnga, pero ndoñe ntsamana mo chě Běngbe Bětsabe bocacana entšangcá; chca, chěnga mondměna mo Satanásbe entšangcá, nje chábioye jtseservěne y jtsatschuanayěse.

¹⁰ Ndoñe matauatjěngana chě ndoñe yapa bėn y tšěngaftanga šmochjasufrima, er Satanás echanjama tšěngaftanguentšěnga báseftanga cárceloye ín्यěnga chacmětámiamama, jin्यama ntsachetšá Crístbeñe ošbuáchiyana šmobomnama, padecena soyěnguiñe šmojtsemna ora; y entsamna baseftayté jasúfriana. Sempre bėtscá ošbuáchiyana, y ainaniñe bėts añemo šmochtsebomna, masque jobanámnaca chacmotsamna, Cristbiamama trabájaye causa. Chca chašmojtsaměse, atse chanjama tšěngaftanga chašmotsebomnama mo canye uacanana soycá, chě nyetsca tescama yomna tšabe vida.

¹¹ Chě jouenama tmojtsobeněnga, chamouena ndayá Espíritu chě ndayenache ošbuachiyěngcá

enefjuanënga yojsëtsëtsnacá. Chë padecena soyënguentšana tšabá chamojábocana mo ayëñjanayëngcá, ndegombre chënga ndoñe queochátamna játauatjana nyetsca tescama castigánënga jatsmënama ca” –cha šonjaniyana.

Pérgamoca ošbuachiyëngcá enefjuanënga jábuayenama

¹² Mëntsánaca cha šonjaniyana: “Pérgamo bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë nyets utoicajana puerte efšana espadëja entsatbëná:

¹³ Atše sëndëtatsëmbo ntšamo yomna tšëngaftangbe oyenentše, canye luare ndayentše Satanás entsángbioye puerte iuamënda. Masque chca, tšëngaftanga sempre nye atše šmondétseserverna, y ndocna te chešmáisayana átšbeñe ndoñe šmondošbuaché ca, ni mo Antipas, chë canye nyets tempo atšbe ustoná y atšbiama ndegombre oyebuambnayá, ínÿenga tmonjanóba ora. Y lempe chca tojopasá tšëngaftangbe pueblentše, ndayentše Satanás bëtsca entsana.

¹⁴ Pero básefta soyënga sëntsebomna tšëngaftangbe contra jayanama: Chentše tšëngaftangbeñe báseftanga montsemna, soyënga montsabuatambá ntšamo bayté entsemna Balaam enjanabuatambacá. Cha rey Balácbioye tbojanbuayená ntšamo jamana Israeloca entsángbioye jáingñama, chënga chë ntšamo ndoñe tšabá yomncá chamotsamama; y chca, Balac tojanma chë ínÿenga diosënga yojamna ca

imojanajuabná soyënga jadórama uátsëmbona saná chë Israeloca entsanga chamosama, y shembása o boyabásaftaca bacna soyënga chamotsamama.

¹⁵ Chéntšnaca ínÿenga montsemna, y chëngna chë nicolaitëngbe buatëmbana soyënguiñe mondošbuaché, y chca buatëmbana soyënga ndoñe tšabá quenátsmëna.

¹⁶ Šmochtsejuabnaye ntšamo šmojtsamama, chëngbioye tšëngaftangbeñe šmojtsëuantana ora, y chca jtsamana šmochjajbaná; er ndóñese, atše betscó tšëngaftangbioye chanjá, y chë chca bu-atëmbana soyënguiñe ošbuáchiyana ndoñe tmon-jajbanángaftaca chanjéntsja chë atšbe uayoicana endóbocana espadéjaca.

¹⁷ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá. Chë padecena soyënguentšana tšabá chamojábocana mo ayënjanayëngcá, chëngbioye maná chanjátšataye chamosama, chë celoca tandëse, ndayá Bëngbe Bëtsá tempo entsángbioye ndoñe tonjinÿanyé; y canÿe fjantse ndëtsëtema chanjáyentsbuachiye, chënga oyejuayënga šmojábemama. Chiñe canÿe tsëm uabaina echantsábemana; ndocná chë uabaina quenátabuatma, ndayá nÿe chë chamojóyëngacñënga ca” —cha šonjaniyana.

Tiatiroca ošbuachiyëngcá enefjuanënga jábuayenama

¹⁸ Mëntšánaca cha šonjaniyana: “Tiatira bëts puebloca ošbuachiyëngcá enefjuanëngbeñe

chaotsemándama uámana ichmonábioynaca mēntšá mabobema:

Mēntšá entsichamo Bēngbe Bētsabe Uaquiñá, chē mo iñeshcá uafšná y mo entšéjuaca jojona puerte chaotsebuashinýinýanama bronce shecu-atšēnga bomná:

¹⁹ Atše sēndētatsēmbo ntšamo tšēngaftanga šmoyenama; sēndētatsēmbo ntsachetsá tšēngaftanga Bēngbe Bētsábioye y nýetscángbioye šmababuánýeshanama, ntšamo tšēngaftanga Bēngbe Bētsábeñe puerte šmošbuáchema, ntšamo chábioye šmoservénama, ntšamo tšēngaftanga ínýenga šmojubabuache y ntšamo Bēngbe Bētsábeñe jtsojátmanēse becá šmojoboyá padecena soyēnguiñe; y sēntsetatsēmbo mora más bētscá tšabe soyēnga šmojtsama, ntšamo tšēngaftanga átšbeñe jtsošbuáchiyama šmonjanbojatsé orscama.

²⁰ Pero canýe soye sēntsebomna tšēngaftangbe contra jayanama: Tšēngaftangbeñe šmondēuantana chē shembása, mo chē bacna reiná Jezabelcá endmēnábioye. Chē shembása entsichamo Bēngbe Bētsabe juabna oyebuambnayá canmēna ca; pero chabe buatēmbana soyēngaca atšbe oservénēnga entsaíngña, shembása o boyabásaftaca bacna soyēnga chēnga chamotsamama, y chē ínýenga diosēnga yojamna ca imojanajuabná soyēnga jadórama uátšēmbona saná chamosama.

²¹ Cha sēnjuená atše chjacastíga ca, chca juabnayana ndoñe tonjatrocasa, y canýe boyabásaftaca bacna soyēnga amana ndoñe tontsajbanasa. Cha jacastígama batšá sēnjobatma, nderado chca amana nanjatróca, pero ndoñe chenátsošena.

²² Mora atše chanjama bëts šocana cha chaboshachama, y chë cháftaca bacna soye tmojamënga, juabnayana ndoñe tmonjatrocá y chca jtsamana ndoñe tmontsajbanase, chëngbiamana chanjama puerte chamosufrima;

²³ y chë shembásabe básenga chantsëbaye. Chca, nyetsquénache ošbuachiyëngcá enefjuanënga mochántsetatsëmbo, ndayá entšanga juabniñe y ainaniñe tmojuabnacá atše tsuábuatmama; y cada ona tšëngaftanguentsá, chca bacna soye cháftaca tojamá, ntšamo ibojtsomerecencá chanjacastíga.

²⁴ Pero tšëngaftangbentše, ínÿenga Tiatira pueblentše šmojtsemnënga, chë shembásabe buatëmbana soyënguiñe ndoñe šmontsošbuachenga, y chë ínÿenga imuábuatma Satanasbe soyënga, chë ndoñe paselo josértama soyënga ndoñe šmonjuabuátmanënga, tšëngaftanga ndoñe quebochatamënda inÿe más toto soye chašmotsamama.

²⁵ Pero nÿe sempre šmochtsama ntšamo mora šmojtsamcá, y šmochtsiyena ntšamo chë Bëngbe Bëtsábicana šmojóyëngacñe soyënga yomncá, atše quem luaroye jesabámëntscuana.

²⁶ Chë padecena soyënguentsana tšabá chamojábocana mo ayëñjanayëngcá y ntšamo atše sëndëmandacá chamojtsamënga, chë quem luarentše ya ndoñe más vida jesebomnámëntscuana, atšbe obenana chanjátšataye nyetsca mándayëngbentša entšángbeñe jtsemádayama,

²⁷ ntšamo atšbe Taitá chabe obenana šojatšetacá; y chënga entšángbioye puerte obenánaca mochántsamëndaye, mo canÿe

hierro varëfjaquécá, y chëngbe contra chamojtsemnëngbioye mochántsapochocaye, mo nÿe matbajënga tmojtsëtsjanjnacá.

²⁸ Y chë jabínÿnama ora bínÿnaye estréllnaca chanjátsataye.

²⁹ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” –cha šonjaniyana.

3

Sardisoca ošbuachiyëngcá enefjuanënga jábuayenama

¹ Mëntsánaca cha šonjaniyana: “Sardis bëts pueblentse ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë Bëngbe Bëtsabe canÿsëfta espíritënga y chë canÿsëfta estrellënga bomná: Atše lempe sëndétatšëmbo ntšamo tšëngaftanga šmoyenama; atše sëndétatšëmbo tšëngaftangbiamá ínÿenga tša jtsichámuana Bëngbe Bëtsá jasérviamá bëtscá šmojtsama ca, pero ndegombre tšëngaftanga nÿe batšatema šmontsama, y chca, chabiamá mo obanëngcá šmondmëna.

² Botamana šmochjenóbobonÿe y más šmochtsama chë Bëngbe Bëtsá jasérviamá cabá šmondama básefta soyënga. Ndoñe yapa quenatájamna chë tšabe soyëngnaca chašmotsajbanama, er atše sënjinÿe chë Bëngbe Bëtsábioye jasérviamá ntšamo jtsamëse šmoyencá, atšbe Bëtsabiamá ndoñe yapa tšabá quenátsmëna.

³ Asna, šmochtsenójuabnaye ndayá Běngbe Bětsábicana šmojóyěngacñama, y chabiana šmojouena soyěnguúñnaca. Ntsamo chě soyěnga yomncá šmochtsiyena, juabnayana šmochjatróca y šmochjótša bětscá jtsamana Běngbe Bětsá jaserviama. Ndoñe tšabá cach tšěngaftanga chašmonjenójuabose y juabnayana ndoñe chašmonjatrocace, nýe ndeolpe chanjá tšěngaftangbioye, mo canýe atbēbanacá, chabiana ndocná tontsejuabná ora, y ndegombre tšěngaftanga ndoñe quešmochátstatšěmbo mocna ora atše tšěngaftangbioye chjama.

⁴ Masque chca, Sardisentše tšěngaftangbeñe básefta entšanga mondměna, chěnga ndoñe chematajbaná oyenana tšabe soyěnga jtsaměse, bacna soyěnga játamama. Chěngna átšeftaca mochántšajna uafjantsějuangá uichětjoněnga, chěnga chca mercedo montsebuajónayeca.

⁵ Chě padecena soyěnguentšana tšabá chamojábocana mo ayějanayěngcá, chca uafjantsějuangá uichětjoněnga mochántsemna, y chěngbe uabaina ndoñe quichatsjuána chě tšabe vida mochjónýeněngbe uabaina enduábemana librěsentšana, ndayá atše, Běngbe Bětsabe delante y chabe angelěngbe delante, chěnga atšbe entšanga imomna ca chanjayana.

⁶ Chě jouenama tmojtsobeněnga, chamouena ndayá Espíritu chě ndayenache ošbuachiyěngcá enefjuaněnga yojtsětsětnacá ca” –cha šonjaniyana.

Filadelfioca ošbuachiyěngcá enefjuaněnga jábuayenama

7 Měntšánaca cha šonjaniyana: “Filadelfia bėts puebloca ošbuachiyėngcá enefjuanėngbeñe chaotsemándama uámana ichmonábioynaca měntšá mabobema:

Měntšá entsichamo chė uamaná y ndegombre oyebuambnayá, chė jtsemándayama puerte obenana bomná, ntšamo Rey David enjanbomncá, chė nda ndayá chaotsemnama tojamandá ora, ndocná ntsoobenana jamama chca ndoñe chaondětsemnama, y ndayá ndoñe chaondětsemnama tojamandá ora, ndocná ntsoobenana jamama aíñe chaotsemnama:

8 Atše lempe sėndětatsėmbo ntšamo tšėngaftanga šmoyenama. Minyėnga, atše sėnjama tšėngaftanga bėtscá tšabe soyėnga chašmotsebomnama, y ndocná quenátobena jamama chca ndoñe chaondětsemnama; y chca entsemna mo atše tšėngaftangbiamama canyė bėšáša cuafjatėfjcá, y chėša jtatámiamama ndocná quenátobena. Atše sėndětatsėmbo tšėngaftanga batšatema obenana šmobomnama, pero šmojouena ntšamo jtsamama tcbonjauyancá, y ndocna te chešmátayana atšbe entšanga ndoñe šmondmėna ca.

9 Atše chanjama, chė mo Satanasbe entšangcá imomnėnga, nyė chábioye jtseservėnėse y jtsatschuanayėse, chė judiėnga imomna ca ichámėnga, pero chė Bėngbe Bėtsabe bocacana entšangcá ndámėnga y bosterėnga, chėnga tšėngaftangbioyechamua y tšėngaftangbe delante chamoshamentšė, tšėngaftangbiamama respeto jinyanjıyama, y chca, chėnga chamotsetátšėmbo atše sempre cbababuányėshanama.

10 Atše tcbonjanamëndá, Bëngbe Bëtsábeñe jtsobátmanëse, lempe chašmotsoboyá padecena soyënguiñe, y tšëngaftanga chca šmonjama. Chíyeca, atše puerte tšabá cbochántsanÿena, chë quem luarentše oyenënga nÿetscanga jasúfriama y padecena soyënguiñe jtsemnama chaojtsemna ora, Bëngbe Bëtsábeñe aíñe o ndoñe mondošbuáchema jinÿanÿiyama.

11 Cachiñe quem luaroye betSCO chanjésabo. Sempre šmochtsama ntšamo mora šmondamcá, y Bëngbe Bëtsábiocana šmojóyëngacñe soyënga šmochtsinÿena; chca ndocná chaondobená ndayá jamana, y chë sóyeca chaoma tšëngaftanga ndoñe chašmondóyëngacñe ndayá Bëngbe Bëtsá chë chábioye jtsešervénama ndoñe tmontsajbanángbioye yochjatsataycá, chëngbe uacanana soye.

12 Chë padecena soyënguentsana tšabá chamojábocana mo ayënjanayëngcá, chëngbiana atše chanjama sempre Bëngbe Bëtsabe delante chamuesomñama, y chca, chënga mochántsemna mo chë Bëngbe Bëtsabe bëts yebnentša ucuatjoniñcá; ndocna te Bëngbe Bëtsábentšana quemocháisebocana; y chëngbeñe atšbe Bëtsabe uabaina chanjuábema y atšbe Bëtsabe bëts pueblentša uabaina, chë tsëm pueblo Jerusalén, chë celocana yobá pueblo, Bëngbe Bëtsábiocana. Y chëngbeñnaca chanjuábema atšbe tsëm uabaina. Lempe chca chanjama jinÿanÿiyama chënga Bëngbe Bëtsábenga mochtsemnama.

13 Chë jouenama tmojtsobenënga, chamouena ndayá Espiritu chë ndayenache ošbuachiyëngcá

enefjuanënga yojtsëtsëtsnacá ca” –cha
 šonjaniyana.

*Laodiceoca ošbuachiyëngcá enefjuanënga
 jábuayenama*

¹⁴ Mëntšánaca cha šonjaniyana: “Laodicea
 bëts pueblocá ošbuachiyëngcá enefjuanëngbeñe
 chaotsemándama uámana ichmonábioynaca mëntšá
 mabobema:

Mëntšá entsichamo chë sempre Ndegombrá
 endmëná, chë Bëngbe Bëtsabe soyëngama nde-
 gombre oyebuambnayá, y chë ndábeyeca Bëngbe
 Bëtsá quem luare tojanmá:

¹⁵ Atše lempe sëndëtatšëmbo ntšamo
 šmoyenama. Atše sëntsetatšëmbo tšëngaftanga
 ndoñe yapa šmontseboše Bëngbe Bëtsá jaserviama,
 pero Bëngbe Bëtsabe buayenana soyënga ndoñe
 lempe šmontsaborté. Y chca, nye batšatema
 šmojtseboše Bëngbe Bëtsá jaserviama; chca,
 tšëngaftanga šmontsemna mo tibiye buyeshcá,
 ni ntšniñiye, ni shécbaniye. ¡Atše sëntseboše
 tšëngaftanga chašmotsemna mo ntšniñiye o
 shécbaniye buyeshcá, tšabá jtsamëse o tondaye!

¹⁶ Chca, tšëngaftanga tibiye buyeshcá
 šmondmëna, y ndoñe quešmátseboše bëtscá
 jamama, pero Bëngbe Bëtsabe soyënga ndoñe
 lempe šmontsaborté. Chíyeca atše sëntsejuabná
 jtsébatena, mo nda tibiye búyeshe tojëtsbuashëtjčá,
 chcaye ndoñe bondogustana causa.

¹⁷ Er tšëngaftanga jtsichámuana bomnënga
 šmomna ca, puerta tšabá šmojábocana
 y tondaye cmontsabuáshebena ca, pero
 ndoñe quešmátstatsëmbo Bëngbe Bëtsabe

soyënga bëtská cmojtsabuáshebenama. Chca, tšëngaftanga šmontsemna nÿa ndoñe tšabá, ínÿenga ngménana chacmotsabamna, mo ndbomñëjemëngcá, mo jtanëngcá, Bëngbe Bëtsabe soyëngama ntsosertancá, y mo enašëngcá, bëtská Bëngbe Bëtsabe soyënga ntsebomncá.

¹⁸ Chíyeca cbabuayená, átšbentšana chašmuatsjinÿe chë Bëngbe Bëtsabe soyënga y uámana soyënga, mo chë ena castellano jabemama, iñëjana fjëchnënguëse castellano átšbioye šmojtsontšabuamnañcá. Tšëngaftanga Bëngbe Bëtsabe delante mo enašëngcá šmondmëna, er cha endonÿá chë ba bacna soyënga ntšamo tšëngaftanga šmojtsamcá. Smochjaleséncia atše chachëjabuache tšëngaftanga Bëngbe Bëtsabe bominÿiñe tšábenga chašmotsemnama, mo juichëtjuama uafjantse entšayá átšbioye šmojtsantšabuamnañcá. Chca šmochjama, tšëngaftanga Bëngbe Bëtsabe delante ndoñe chašmondëtsëuatjama. Smochjaleséncia atše chachëjabuache tšëngaftanga Bëngbe Bëtsabe soyëngama chacmósertama, mo tšëngaftanga bominÿe šocanama šnana átšbioye šmojtsontšabuamnañcá. Chca šmochjama, Bëngbe Bëtsabe soyëngama puerte tšabá chacmósertama.

¹⁹ Atše chë sëndábabuanÿeshanënga sëndbaucácana y sëndbábuayenaye. Chíyeca, lempe ntšamo šmojobenacá šmochtsama Bëngbe Bëtsá jaserviama, y juabnayana šmochjatróca, y nÿets tempo puerte šmochtseboše Bëngbe Bëtsá jtseservénana.

20 Nderado canye tšabe amigo yebnoye tojabo y tojachembo, tšengaftanga šmojouenëse y bësáša šmojebiatëfjese, cha jamashënguana, y cányiñe cháftaca joyejuayana y jasana. Cachcá, atše entšanga sentsachembuana chašmolesenciá chëngbe ainaniñe jtsiyenama. Nderado nda šojóyeunase, atše chanjámashëngo chabe ainaniñe jtsiyenama, y nyets tempo cháftaca cányiñe mo canyáca chanjëftsemna.

21 Chë padecena soyënguentsana tšabá chamojábocana mo ayëjanayëngcá, atše chanjama chënga puerte bëtsëtsanga chamotsemnana ntšamo atše sëndmëncá, y átšeftaca chamótbemama, atšbe uámana tbemanentše jtsemándayama, ntšamo atše atšbe uayayëngbioye sënjayëñjanacá, y atšbe Taitáftaca chabe uámana tbemanentše tijotbemcá.

22 Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá” —cha šonjaniyana.

4

Chë Ainënga Bëngbe Utabnabe uámana tbemanentša natsana imojtsechuanaye

1 Chentšana mo otjenayoquécá sënjáninye. Sënjanrrepará y sënjáninye celoca canye bësáša enjétsatëfjna, y chë natsana sënjanuena oyebuambnayana, chë enjamna mo canye trompetëfjua cuafjuajatëtcá, mëntsá šonjétsatsaye: “Moye másëngo, atše cbochanjinýinýiye ntšamo más chcoye yochjopasacá ca.”

² Cachora, chë Uámana Espíritbeyeca, mo atšbe ainana celoca cuaftsemncá atše sënjanoquedá, y sënjáninÿe celoca enjëtsemna canÿe reybe uámana puesto, y chentše canÿa enjëtsetbemana.

³ Chentše enjëtsetbemaná enjamna, puerte tëshinÿná mo jaspe ndëtšbecá, puerte buanganá mo cornalina ndëtšbecá, y chë uámana puesto shëconana canÿe tsëfcuácuatjo enjamna, y enjëtsebuashinÿinÿana mo canÿe esmeralda ndëtšbecá.

⁴ Chë reybe uámana puesto juachajana, inÿe uta bnëtsana y canta puesto sënjáninÿe, y chiñe uta bnëtsana y canta bëtsëjémënga amëndayënga monjëtsetbiamana, uafjantsëjuangá uichëtjonënga, y castellano coronëshangá monjëtšabestšajona.

⁵ Chë uámana puestentsana enjëtšobocana tcuinÿëjënga, becá shauenanana y juesasanana; y chë uámana tbemaniñentša natsanoicna, canÿsëfta uajuinÿanëshsha enjëtšangbototjuana; chë uajuinÿanëshangá entsayana chë Bëngbe Bëtsabe canÿsëfta espíritënga.

⁶ Y chë uámana puestentša natsanoica enjëtsemna mo canÿe mar bejaycá, tëshínÿniye mo canÿe cristal ca uabaina ndëtšbecá.

Chë luariñe tsëntsaca, chë uámana puesto enjëtsemnentše y chë shëconánëjana monjëtsemna canta Ainënga, nÿëtsañe fšnëbéngaca, natsanoica y stëtšoica.

⁷ Chë natsana Ainá enjamna mo canÿe leoncá, chë inÿe Ainá mo canÿe torošcá, chë inÿe Ainá enjánbomna mo canÿe entsabe jubiacá, y chë inÿe Ainá mo canÿe águila tojtsongüefjnacá.

⁸ Chë canta Ainënga, cada ona chnënguana ju-

atëngmiáša enjanábomna, y tsoicajana y shjoicajana nyétsañe fšněbenga monjánbomna. Y chënga nyëts tempo, ntjochnacá mëntšá monjánichamo: ¡Uamaná, Uamaná, Uamaná, Bëngbe Utabná, Bëngbe Bëtsá nyëts obenana bomná, nda enjamná, endmëná y sempre echanjëftsemná ca!

⁹⁻¹⁰ Chca chë Ainënga Bëngbe Bëtsá bëtscá tmontanchuá, Bëngbe Bëtsá chë uámana puestentše tbemaná, chë nyëts tempo y nyëtsca tescama oyená. Chënga puerte respeto chabiana monjëtsebomna y bëtscá tmontanchuá. Cada ora chënga chca tmonjanma ora, chë uta bnëtsana y canta bëtšëjémënga amëndayënga, chë uámana puestentše tbemanabe shecuatšentše joshamentšiyana y chábioye jtsatschuanayana, chë coronëshangá chë natsanoica jutšanana, y mëntšá jtsichámuana:

¹¹ Aca nyëts merecido condëtsobuájoñe, Bëngbe Utabná y Bëngbe Bëtsá, entšanga chamotsinÿanÿnama, aca puerte bëtšá comnama, y chamotsichamo aca nyëts respeto buajoná comna, y nyëts obenana bomná comna ca, er aca nyëtsca soyënga tcojama; aca icnabóseyeca chë soyënga yojtsemna y aca chca tcojanma ca.

5

Chë uabemana uándmanana tsbuanácha y chë Oveshatema

¹ Chë uámana puestentše enjetsetbemanabe catšbioica cucuatšinë canÿe uándmanana

tsbuanáchanaca sēnjáninÿe, y nÿétsañe enjétsabemana tsoicajana y shjoicajana, y canÿsēfta tsengájaše sellēngaca enjétsajandmanana.

² Y canÿe ángel puerte obenana bomná sēnjáninÿe, y cha mēntšá enjétsayebuache: “¿Nda merecido yobuájona, quem uándmanana tsbuanácha jutéfjonama y chē sellēnga jutsécama ca?”

³ Pero, ni celoca, ni quem luarentše, ni quem luarentša jashenoye, ndocná quenjatsmēna obenánaca chē uándmanana tsbuanácha jutéfjonama, ni juinÿama.

⁴ Y atše puerte sēnjánenobošachna, er ndocná ntjónÿnana merecido buajoná chē uándmanana tsbuanácha chautéfjonama, ni chauinÿama.

⁵ Pero canÿa chē bētsējemēnguentšá šonjaniyana: “Ndoñe más matenóbošachena; mouena, chē Judabe pamillentšá, León ca uabobainá, mando y obenana bētsebomnama, chē rey Davídbentšana Entšá, tonjayējaná; cha entsobena chē uándmanana tsbuanácha jutéfjonama, y chē canÿsēfta sellēnga jutsécama ca.”

⁶ Chora sēnjáninÿe, chē uámana puesto y chē canta Ainēnga y chē bētsējemēngbe tsēntsaca, canÿe Oveshatema tsanana, pero enjétsinÿna mo cuaftsobacá. Chē Oveshatema enjānbomna canÿsēfta tsētjonēse y canÿsēfta fšñébé. Chē canÿsēfta fšñébé monjaninÿinÿná chē Bēngbe Bētsabe canÿsēfta espíritēnga, chē Bēngbe Bētsá nÿets quem luarējana tojánichamonga.

⁷ Chē Oveshatema tonjanobeconá y chē uándmanana tsbuanácha tonjanaca, chē

uámana puestentše tbemanabe catšbioica cucuatšentšana;

⁸ y chabe cucuatšiče tonjanaca ora, chë canta Ainënga y chë uta bnëtsana y canta bëtsëjémënga amëndayënga chë Oveshatembe shecuatšentše tmonjanoshamentšé. Njëtscanga monjëtšëtbëna arpangá y castellano codbenga jútjena inciensiýeca; chë codbenga inciensiýeca enjamna chë Bëngbe Bëtsabe entšanga tmojayana palabrénga, cháftaca jencuéntama ora.

⁹ Y quem tsëm canto montsancántaye:

Aca merecido condëtsobuájoñe, chë uándmanana tsbuanácha chacuacama y chë sellënga chacutsëcama;

er acbe buiče juabuáshanëse tconjanóbana, y chca enjamna mo crocénana cuafjëtšajocá, Bëngbe Bëtsabiana chamotsemnana,

entšanga njëtsca cachca buiče bomnënguentsana, njëtsca biyana bomnënguentsana, njëtsca canýe entšanguentsana, y njëtsca mándayëngbentša entšanguentsana.

¹⁰ Aca tcojama chënga chamotsobena ácaftaca jtsemándayama

y uámanënga chamotsemnana, Bëngbe Bëtsábioye mo bachnangcá chamotseservénama,

y quem luarentše chënga montsemánda ca — chënga monjëtseversiaye.

¹¹ Y chca sënjëtsonýaye ora, mallajta angelëngbe oyebuambnayana sënjanuena, y chënga monjëtsemna chë uámana puestentše, chë Ainënga y chë bëtsëjémënga amëndayëngbe shëconana. Njëtsá bëtscá angelënga monjëtsemna, corente mallajta;

12 y chënga mëntsá monjétsayebuache:
 ¡Chë Oveshatema cuafjobacá endmëná,
 merecido endëtsobuájoñe, nÿets obenana, nÿets
 bomnana,
 nÿets osertánana y nÿets añemo chaotsebomnana,
 y entšanga chabiamama chamotsichamo cha nÿets
 respeto buajoná yomna ca,
 y chamotsinÿanÿnama cha puerte bëtsá y uamaná
 yomnama,
 y nÿetscanga chamotsatschuanama ca! —chënga
 monjétsayebuache.

13 Y sënjanuena, lempe ntšamo Bëngbe Bëtsá to-
 janmcá aina soyënga, celoca, quem luarentše,
 quem luarentša jashenoye y chë mar béjayoca,
 chëngnaca mëntsá monjétsichamo:
 ¡Chë uámana puestentše tbemanábioye y chë Ove-
 shatema nÿetscanga nÿets tempo y nÿetsca
 tescama chamótsatacheuanaye
 y chamotsichamo chata puerte uámanata y nÿets
 respeto buajonata ibomna ca,
 y chamotsinÿanÿná chata puerte bëtsétsata y obe-
 nata bëtsemnama ca!

14 Y chë canta Ainëngna monjétsichamo:
 “Chca chaotsemna ca.” Y chë bëtsëjémënga
 amëndayëngna tmonjanoshamentšé y chátbioye
 monjétsatacheuanaye.

6

*Chë Oveshatema chë canÿsëfta sellënga
 tonjanëtsécá*

¹ Chentšana más sënjáninÿe; chë Oveshatema
 chë canÿsëftentšana natsana sello tonjanëtsécá
 ora, sënjanuena canÿa chë canta Ainënguentšana

puerte jabuache, mo cuafjajuesascá, mēntśá enjétsichamo: “¡Mabo ca!”

² Sēnjanrrepará y sēnjáninŷe canŷe fiantse couaye, y chábeñe enjetsenjaquená canŷe arquēja enjétsatbēna. Chábioye canŷe coronēsha tmonjaniyé, y mo canŷe ayēnjanayacá tonjéftsanbocna, y cabá más jatsyēnjanámnaca.

³ Chē Oveshatema chē inŷe sello tonjanétsēcá ora, sēnjanuena chē inŷa chē canta Ainēnguentśana mēntśá enjétsichamo: “¡Mabo ca!”

⁴ Y inŷe couaye tonjánbocna, canŷe buanganá; y chē enjetsenjaquená obenana tonjanóyēngacñe jamama chē fshantsentśa natjēmbana vida chaot-sopochocama, entśanga chamotsenóbama; y canŷe bēts espadēja tmonjanoyé.

⁵ Chē Oveshatema chē inŷe sello tonjanétsēcá ora, sēnjanuena chē inŷa chē canta Ainēnguentśana mēntśá enjétsichamo: “¡Mabo ca!” Sēnjanontjeśé y canŷe ftsenga couaye sēnjáninŷe, y chē enjetsenjaquená canŷe romanēša enjétsētbēna.

⁶ Y chē canta Ainēngbeñe canŷe oyebuamb-nayana mēntśá sēnjanuena: “Nŷe canŷe kilo trigo canŷe tesca trabajuama, y unga kilo cebadá canŷe tesca trabajuama; pero chē aceitiye y chē vínoyna ndoñe cattsepochoćaye ca.”

⁷ Chē Oveshatema chē inŷe sello tonjanétsēcá ora, chē ústonoca Ainá enjétsichamo: “¡Mabo ca!”

⁸ Sēnjanontjeśé y canŷe shatsēsiye couaye sēnjáninŷe; chē enjetsenjaquená Obanana ca enjanabaina, y stētsoica bonjétsēstona canŷa, Obanēnga imomna luare ca uabainá; y chátbioye obenana tmonjanatśatá cántañentśana cánŷentśe

quem luarentše jtsepochócama, chentša entsanga jtsapochócase, entsanga tmojtsentsjanama, bêts shěntsaněngaca, šocaněngaca y quem luarentša tšátjaye bayěngaca.

⁹ Chě inye sello tonjanětsěcá ora, sěnjáninye chě altarentša tajsoye chě tmojanóbaněngbe espíritěnga, chě Běngbe Bětsabe palabra entsanga abuaiynayama tmojanóbaněnga.

¹⁰ Chora chěnga tmonjanontsé tša uayebuáchana: “Uamaná y ntšamo to-jašebuachenacá lempe amá běngbe Nduiño, ¿ntseco quem luarentša entsangbiama cochjayana ndoñe tšabá tmonjamama, y chě běngbioye obanayama cochjácastigaye ca?”

¹¹ Chentšana n̄yetscángbioye uafjantse entsayá tmonjaniyé y tmonjanéyana batsatema más chamobatmá ca, chě cachěngcá Crístbeyeca catšátanga y oservéněnga, chě cachěngcá mochjanóbaněnga, n̄yetscanga choca chamojtsemněntscuana.

¹² Y más sěnjáninye; chě inye sello cha tonjanětsěcá ora, jabuache fshantse tontsanangměmana; shinye tontsanftšénganga, mo chě obaná tojtsemnama juichětjuama entsayacá, y n̄yets juashcona mo buiñcá enjětsin̄yena,

¹³ y estrellatéměnga celocana fshantsoye tontsantquěcjana, mo canye higo betiye jabuache bín̄yiaca tojtseshatíyeyna ora, chě nguěfshna higuěbenga cuafjatquěcjancá.

¹⁴ Y celoca luare tontsanenatjěmba mo canye tsbuanácha cuafjuandmanacá, y n̄yetsca

tjañe y béjayoca fshantsënga, chë ndayentše enjamnentšana tontsanojuaná;

¹⁵ y nÿetscanga, fshantsoca reyënga, uámanënga, soldadëngbe amëndayënga, bomnënga, obenana bomnënga, y nÿetscanga chë nÿets tempo nÿe ínÿabiamá oservénënga y chë cachëngbiamá trabájayëngnaca, chë cuevëshënguiñe y bëts ndëtšbenguenache tjañe tmontsanóitana;

¹⁶ y chë tjañëngoye y chë ndëtšbengoye montsanichamo: “¡Bëngbioye šmotsëtebuantsá y šmotsaitame, chë uámana puestentše tbemanabe bominÿentšana, y chë Oveshatembe uabouana castigo, cha bëngaftaca tbojetnama, bëngbeñe ndoñe chaondëtsemnama!

¹⁷ Er chë uachuana te chabe castigo jtsebínÿnama te tojóshjango; y mora ¿nda nanjobenaye chë sóyeca ndoñe chamondëtseepochocama ca?” –chënga montsanichamo.

7

Chë Bëngbe Bëtsábioye oservénënga chë uabouana castigüentšana mochántsatsebacana

¹ Chca tonjanopasá chentšana, canta angelënga sënjánanÿe, monjétsatsana chë quem luarentša canta opochó cayenache; chënga ndoñe quemënjatanleséncia chë canta binÿiënga jtsebínÿnama, ndoñe chaondëtsebinÿiayama, ni fshantsentše, ni mar béjayoca, ni ndocna betiyeshënguiñe.

² Inÿe ángelnaca sënjáninÿe, shinÿe bocana luaroicana enjetsabó, y chë Bëngbe Bëtsá Ainabe sello enjétsiyëboye. Chë ángelna chë inÿe canta

angelëngbioye, ndëmuanyëngbioye obenana tmojanatšatá chë fshantsentše y mar béjayoca lempe jtsepochoćama, chëngbioye jabuache tonjánabachembo:

³ “¡Tondaye šmatjapochóca, ni fshantsoca, ni mar béjayoca, ni betiyeshënguiñe, chë Bëngbe Bëtsabiana oservénëngbioye chë sélloca juentsaca fchayauínÿnanantscuana, ndoñe chamondëtsapochocama ca!”

⁴ Y sënjanuena buétanga chë sélloca tmojánauinÿnanayama: canÿe patse, canta bnëtsana y canta uaranga entšanga uinÿnanánënga nÿetsca Israeloquentša bëts pamíllanguentšana.

⁵ Judabe pamillentšana, bnëtsana uta uaranga uinÿnanánënga;

Rubenbe pamillentšana, bnëtsana uta uaranga;

Gadbe pamillentšana, bnëtsana uta uaranga;

⁶ Aserbe pamillentšana, bnëtsana uta uaranga;

Neftalibe pamillentšana, bnëtsana uta uaranga;

Manasesbe pamillentšana, bnëtsana uta uaranga;

⁷ Simeonbe pamillentšana, bnëtsana uta uaranga;

Levibe pamillentšana, bnëtsana uta uaranga;

Isacarbe pamillentšana, bnëtsana uta uaranga;

⁸ Zabulonbe pamillentšana, bnëtsana uta uaranga;

Josebe pamillentšana, bnëtsana uta uaranga;

y Benjaminbe pamillentšana, bnëtsana uta uaranga entšanga.

Chë mallajta entšanga uafjantsëjuangá uichëtjonënga

9 Chentšana, sēnjanrrepará y mallajta entšanga sēnjánanýe, ndocná quentaisobenaye jacúntana, nýetsca mándayēnguentsšana, nýetsca cachca buiñe bomnēnguentsšana, nýetsca canýe entšanguentsšana, y nýetsca biyana bomnēnguentsšana; chēnga monjétsatsana chē uámana puesto chē Oveshatembe natsanentše, uafjantsējuangá uichétjonēnga y ramēshangá monjétsētbēna.

10 Nýetscanga tša monjétsayebuache:
 ¡Bēnga atsebacayana endobá, Bēngbe Bētsá,
 chē uámana puestentše entsetbemanábentšana,
 y chē Oveshatémbentšana ca!

11 Y nýetsca angelēnga, chē uámana puesto y chē bētsējémēnga amēndayēnga y chē canta ainēngbe shéconana monjétsatsanēnga, chē uámana puestentša natsanoica tmonjanoshamentsé, fshantsóntscoñe jotsejbénase, y Bēngbe Bētsá tmonjanadorá,

12 mēntšá jayanēse:

¡Chca chaotsemna!

Bēngbe Bētsábioye nýets tempo y nýetsca tescama chamotsadorana

y nýets ainánaca cha chamotsatschuaná.

Entšanga chamotsinýanýná cha puerte bētsá y uamaná bétsemnama;

cha endmēna nýets osertánana bomná, y nýets respeto buajoná, y nýets obenana y añemo bomná.

¡Chca chaotsemna ca! —chēnga monjétsichamo.

13 Chentšana, canýa chē bētsējēmēnguentsšá tonjanoyebuambá y šonjantjá: “¿Ndēmuanýēnga

imomna chë uafjantsëjuangá uichëtjonënga, y ndëmocana tmojabo ca?”

¹⁴ “Taita, aca chëngbiana cotátsëmbo ca” –atşe sënjanjuá.

Y cha šonjaniyana: “Chënga montsemna chë jabuache ngmenënguentšana tsabá tmojábočanënga; chë Oveshatema chëngbiana tojóbana y chëngbe bacna soyëngama perdonánënga montsemna; chëngbe uichëtjonëjuangá tmojtsaboshabé y chë Oveshatembe buíñeca tmojtabofjantsé.

¹⁵ Chíyeca chënga chë Bëngbe Bëtsabe uámana puestentša natsanoica montsemna, y chábioye nýets tempo chabe delante mondëserveda, y chë uámana puestentşe entsetbemaná, chëngbenache jtsemnëse, chënga echántsanýena, mo cuafjutsebotscá.

¹⁶ Ya ndoñe más shëntsana, ni uajuendayana quemochátsbomna; shinýama, ni yapa jënýama ya ndoñe más quemochátssufrina;

¹⁷ er chë Oveshatema, chë uámana puestentša natsana tsëntsaca entsemná, chëngbioye mo oveshëngcá echantsabuajënýa, y echanjunatse béjaye vida bomniye yóbocana luaroje, y Bëngbe Bëtsá echanjama ya ndoñe más ngménana chamondëtsebomnama ca” – cha šonjanjuá.

8

Chë ústonoca sello

1 Chë Oveshatema chë uándmanana tsbuanáchañe chë ústonoca sello tonjanëtsécá ora, celoca ndocá quentétsënëna mo tsëntsa hora nyetsá.

2 Chora sënjánanýe chë canýsëfta angelënga, chë Bëngbe Bëtsabe delante monjétsatsanënga; chëngbioye canýsëfta trompetëfjuangá tmonjaníyë.

3 Chentšana inýe ángel tonjánashjango, canýe castellano matbëtémaca incienso jajuinýiyama, y altar natsanoica tonjantsá; chábioye bëtscá incienso tmonjanoyé chaojuinýema chë castellano altaroca, chë uámana tbemana natsanoica enjëtsemnoca. Chë ángel incienso tonjanjuinýe Bëngbe Utabná jëtschuayama, cánýiñe nyetsca chë Bëngbe Bëtsabe entsanga tmojoyebuambá palabrëngaca, cháftaca jencuéntama ora.

4 Y chë incienso juinýnentša ngona, chë ángelbe cucuatšentšana Bëngbe Bëtsabe delante tonjanótsjua, cánýiñe chë Bëngbe Bëtsabe entsanga cháftaca jencuéntama palabrëngaca.

5 Chentšana chë ángel chë incienso jajuinýiyama matbëtëma tonjanca, chë altarentša chebánbengaca tonjanajutjé, y quem luaroye tonjanëtsana. Chora enjëtsemna tša juesasanana, corente shauenanana, bëtscá tcuinýënga, y quem luare tontsanangmëmana.

Chë trompetëfjuangá

6 Chora chë canýsëfta angelënga, chë canýsëfta trompetëfjua uabomnënga, tmonjanoprontá chëfjuangá juajatëtama.

7 Chë natsana ángel chabe trompetéjua tonjanájatëto, y quem luaroye tmonjanëtsana bëntstá y íneshe, cánÿiñe buíñeca. Ungañentsana cánÿentse quem luarentse tontsanjuinÿe, úngañentsana cánÿentse betiyeshënguñe y nÿetsca nguëfshna shacuanënguñnaca.

8 Chë inÿe ángel chabe trompetéjua tonjanájatëto, y chora chë mar béjayoye tmonjanëtsana canÿe soye mo canÿe bëts tjañe tojtsangbototjuancá, y chë mar béjayiñe úngañentsana cánÿentse buiñe tontsanóbema.

9 Chë mar béjayiñe vida imobomnëngbeñe úngañentsana cánÿentse tontsanopochocá, y chë barquënguëtsnaca úngañentsana cánÿentse.

10 Chentšana chë inÿe ángel chabe trompetéjua tonjanájatëto, y canÿe bëts estrella, mo canÿe uajuinÿanëshacá enjëtsangbototjuana, celocana tonjanótsatse chë úngañentsana cánÿentse béjayënguñe, y béjaye óbocanenache.

11 Chë estrella enjanabaina Untjana ca; y chë úngañentsana cánÿentse buyeshënguñe untjiye tontsanóbema, y chë untja búyeshe causa ba entšanga tmonjanóbana.

12 Chë inÿe ángel chabe trompetéjua tonjanájatëto, y chora tontsanóndbema chë úngañentsana cánÿentse shinÿiñe, y chë úngañentsana cánÿentse juashconiñe y chë estrellënguñnaca. Chca, nÿetsca chentša úngañentsana cánÿentse ibetiñe tonjanoquedá, y chë causa ndoñe quemëntétsebinÿnaye posufta horëntscuana, bnëté canta hora y ibeta canta hora.

13 Chentsana, sënjanrrepará y sënjanuena canye águila, tsbanánoca celoca enjetsongüefjná, jabuache mentsá enjétsichamo: “¡Tša lastema, tša lastema, tša lastema quem luarentša entsangbiana, chë inye trompetëfjuangá chë inye unga angelënga chamojuátëto ora ca!”

9

1 Chentsana chë inye ángel chabe trompetëfjua tonjánátëto, y sënjáninye canye ángel quem luaroje jastjanguana y enjétsinyna mo canye estrella celocana quem luaroje cuaftsotsatsancá; y moye tonjánashjango ora, tmonjanoyé chë uabouana tboca atëfjñentša llavëfja.

2 Chë uabouana tboca atëfjñentše tonjánatëfjo, y chentsana becá ngona tonjánótsjua, mo bëts hornentša ngoncá; y chë uabouana tboye atëfjñentše ngona causa shinye tontsanibétata y nyets celoca ena ngona enjëtsemna.

3 Chë ngonentsana ba tsátjaye chapulinga tmonjánbocana, y nyets quem fshantsëjana tmonjánáshana; y chëngbioye obenana tmonjanatsatá, chánaca jándbemama, mo chë juetjuama alacranëngbe obenancá.

4 Chëngbioye tmonjanamëndá tondaye ntjándbemana chë shacuanënguiñe, ni ndocna nguëfshna matënguiñe, ni ndocna betiyeshiñe; nye chë juentsaca chë Bëngbe Bëtsabe sëlloca nduinynanana entsangna aíñe.

5 Pero ndoñe chematanalesenciá entsángbioye jobáyana, ndayá nye jamama chënga shachna shinjëntscuana tsetshanana chamotsebomnama; y chë chënga monjánama chamotsebomnama

tsetšanana enjamna mo canye alacranbe uetjoniñcá.

⁶ Chca tempo chaojtsemna ora, entsanga mochántseguaye ntšamo jtsóbanama, chë tsetšanënga jauántama ndoñe quemochátobena causa, pero ndoñe quemochátinyëna ntšamo jamëse jtsóbanama; y masque tša mochántseboše jóbanama, chora chëngaftaca ndoñe chca queochatopása, mo jóbanama ndoñe tmonsobencá.

⁷ Chë tsátjaye chapulinga monjétsinyëna mo couayëngcá prontánënga jama entsángaftaca jétsjama; chëngbe bestšašinë monjanábomna mo castellano coronëshangacá, y chëngbe jubiá enjamna mo entsabe jubiácá.

⁸ Stjënashë monjánbomna mo shembásabe stjënashacá, y chëngbe juatsašënga mo leonbe juatsašëngcá.

⁹ Chëngbe cuerpënga jenëuyanama cochaca monjánbomna morocho soyënga, mo hierro soyëngcá, y chëngbe juatëngmiashangá tmojtsabonjná ora, chë shauenanana bëtscá enjamna, mo ba cochëshangá couayënga cuaftsasjojnacá, chë inyëngaftaca jétsjama tmojëftsátjajo ora tojtseshauenancá.

¹⁰ Chënga monjanábomna mo alacranbe uascuatšëjuacá, ba uetotjëfjangaca, y chë uascuatšëjuaca obenana monjánbomna shachna shinjëntscuana entsanga mal chamotsepasama.

¹¹ Chë tsátjaye chapulinga canye amëndayá monjánbomna, chë uabouana tboca mándaye ángel; hebreo biyañna cha uabainá Abadón ca y grieguiñna Apolión o pochocayá ca.

12 Chë natsana pochócayana ya tocjochnëngo, pero más chcoye cabá inye uta soye más pochócayana cachcá echántsemna.

13 Chentšana chë inye ángel chabe trompetéfjua tonjanájatëto, y canye oyebuambnayana sënjanuena, chë Bëngbe Bëtsabe delante enjëtsemna castellano altarentša juatsboica lado sibienache obocanentsana enjëtsovocana.

14 Y chë oyebuambnayana, chë trompetéfjua tonjanájatëto y enjëtsetbëna ángelbioye tbonjaniyana: “Chë canta angelënga chë Eufrates bëts fshájaye tsachoca utsbuanënga mëjafjoná ca.”

15 Y chë canta angelënga tmonjanëjafjoná; y nÿa chë ora, chë te, chë shinÿe y chë uatama chëngbioye tmojanaprontá, chë quem luarentša entsángbeñe úngañentsana cánÿentšënga jtsëbáyama.

16 Atše sënjanuena buétanga imojamna chë angelëngaftaca tmojána soldadënga, couayënguiñe: uta patse millonënga ca.

17 Mëntsá sënjánanÿe mo otjenayoquëcá chë couayënga y chë chëngbeñe enjaquenënga: Chë enjaquenënga monjánbomna morochó soyënga cochaca, jenëuyanama, y chë soye buanganana enjánínÿna, mo iñcá, y fchendana mo chë uámana ndëtsbé jacintcá y tsësiyana inÿnana mo azufrcá; y chë couayënga monjánbomna mo leonbe bestšaścá, y chëngbe uayoicana enjëtsovocana iñe, ngona y azufrana.

18 Y chë úngañentsana cánÿentše entsanga tmonjanóbana quem unga uabouana pochócaye soyëngaca, chë couayëngbe uayoicana enjëtsovocanana: iñe, ngona y azufrana.

19 Er chëngbe obenana entsanga japochócama monjánbomna uayáshañe y uascuatšējuañe; er chëngbe uascuatšējua enjuamna mo mëtšcuayëngcá, bestšašëngaca, y chëjuanga causa entsanga mal montsanpásaye.

20 Pero chë inye entsanga, chë uabouana pochócaye soyëngaca ndoñe tmonjanopochocanga, juabna ndoñe chematantrocá, y ndoñe chematanajbaná amana chë bacna soyënga ntšamo monjanamcá; ndoñe chematanajbaná adórayana chë bacna bayëjënga, ni chë mo diosënga cuaftsemncá jtsejuabnayëse imojánadorana castellano soyënga, midio soyënga, bronce soyënga, ndëtsbé y niñëbé soyënga; y chca soyënga ndoñe quemënjatobena ni jinýama, ni jounama, ni jtsanama.

21 Juabna ndoñe chematantrocá y ndoñe chematanajbaná entsanga obanayana, encjuanayana, bacna soyënga boyabása o shembásaftaca jtsamëse oyenana, ni atbëbanana.

10

Chë ángel base uándmanana tsbuanáchaca

1 Chentsana sënjáninýe inye ángel, puerte obenana bomná; celocana enjétsastjajuana, y chabe shëconana canýe jantšetëshe enjëtsemna; chabe bestšaše tatsëtsacá canýe tsëfcuácuatjo. Chabe jubiá shinýcá enjëtsebuashinýinýana, y chabe shecuatšënga mo úcuatjona niñëbenga cuaftsoiñcá.

2 Chabe cucuatšiñe enjétsëtbëna canýe base uándmanana y utëfjna tsbuanácha. Chabe

catšbioica shecuátšeca chë mar béjayoca tonjantsá, y chë uañicuayóicatšecna, quem fshantsentše.

³ Y jabuache tonjanoyó, mo canÿe león cuaftseyocá; y tonjanoyó ora, canÿsëfta juesasanentša jabuache shauenanana sënjanuena.

⁴ Chë canÿsëfta juesasana chca tmonjanoyebuambá ora, atše sënjanoprontá ntšamo chënga tmonjanayancá juabemama; pero canÿe oyebuambnayana celocana sënjanuena, mëntšá šonjétsatsaye: “Nÿe aca cochtsójuabnañe ntšamo chë canÿsëfta juesasana tmonjayancá, ndocnábioye catjauyana, y chë soye ndoñe catjuábema ca.”

⁵ Chora chë ángel, chë mar béjayoca y quem fshantsentše atsaná sënjaninÿá, chabe catšbioica cucuatše celoye tonjanatsbaná,

⁶ y tonjanjurá Bëngbe Bëtsabiamá, chë nÿets tempo y nÿetsca tescama oyenabiamá, chë celoca, quem luare, chë mar béjaye, y lempe chë luarënguiñe yobinÿncá tojanmabiamá. Tonjánayana: “Ya ndoñe más quemochatobatma; mora Bëngbe Bëtsá echanjama ntšamo tojašebuachenacá,

⁷ er chë tempo chaojóshjango, chë ústonoye ángel chabe trompeté fjua juajatëtama chaojontsé ora, chora ya echanjochnëngo ntšamo Bëngbe Bëtsá jamama yojuabnacá; chë soye nÿetsca entsángbioye cha ndoñe chenatinÿanÿé, ntšamo tempo cha chabe oservénëngbioye, chë chabe juabna oyebuambnayëngbioye tojanabuayenacá ca” —cha tonjánayana.

⁸ Chë atše sënjanuena oyebuambnayana celocana enjétsobocanana, cachiñe šonjanatsëtsá y

šonjaniyana: “Motsa y mauaca chë mar béjayoca y quem luarentše ángel entsemnabe catšbioica cucuatšiñe base uándmanana y utëfjna tsbuanácha ca.”

⁹ As atše chë ángelbioye sënjána; chë base uándmanana tsbuanácha chašuíyema sënjaniyana, y cha šonjanjuá: “Quemëcha, motsásañe. Acbe uayoye uamešquénëcha mo tjouangbe meloycá echántsamna, pero acbe uafsbioyna puerte uauntjécha echantsábema ca.”

¹⁰ As chë base uándmanana tsbuanácha chë ángelbe cucuatšentsana sënjanaca, y sentsanásañe; y atšbe uayoye meloycá enjétsamna, pero sënjanabmuaná y atšbe uafsbioyna puerte uauntjécha tontsanábema.

¹¹ Chora šmonjaniyana: “Aca cmontsemna cachiñe jtëtabuayenana, ntšamo Bëngbe Bëtsá tojayancá chë ntšamo yochjopásama, ba canye luarentša entšángaftaca, ba mándayëngbentša entšángaftaca, ba biyana bomna entšanguentšëngaftaca y quem luarentša reyëngaftaca ca.”

11

Chë útata Bëngbe Bëtsabe juabna oyebuambnayatata

¹ Chentšana canye medídaye niñëfja šmonjanoyé, mo jatšëmbonëfjá, y šmonjaniyana: “Motsa y Bëngbe Bëtsabe bëts yebna y chentša altar cochjamedída, y cochjácuntaye bueta entšanga chentše Bëngbe Bëtsábioye imojtsadorana.

² Pero chë Bëngbe Bëtsabe yebnentše más shjoica luarna cachcá cochjonýaye, ndoñe

catjamedída, er chiñe chë ndoñe judiëngbiana endmëna; y chënga, chë uámana ca uabaina bëts pueblama, canta bnëtsana y uta shinÿëntscuana soyënga mochántsama chiñe jtsepochócama, mo cuaftsebotajnaycá.

³ Pero atše, útata atšbiana tatsëmbuata y oyebuambnayata chanjichamuá atšbe cuenta entšángbioye jábuayenama, canÿe uaranga y uta patse y chnënguana bnëtsana tentscuana. Chatna uajojësha entšayangá uichëtjonata bochántsemna, chca, ngmena bomnama jinÿanÿiyama ca” –chata tbonjánayana.

⁴ Quem útata atšbiana tatsëmbuata y oyebuambnayata bontsinÿinÿena chë uta olivos betíyeca y chë uta candelerešeca, ntšamo Bëngbe Bëtsá, chë quem luarentše mandayabe delante endmëncá.

⁵ Nderado nda tojtseboše chatbiana bacna soye jamama, ndoñe quentatobenaye ntšámnaca jáborlana, er uayoicana íñeshe nanjóbcna y chë uayayëngbioye nantsapochócaye; nderado nda tojábosena chatbiana bacna soye jamama, cachcá cha buántsemna jóbanama.

⁶ Chë útata obenana bondbomna celoca jtsachtama, ndoñe chaonduaftema, entšángbioye Bëngbe Bëtsabiama chabojtsabuayiyná tese; obenana béjayënga buiñe jtsebiama, y jamama quem luarentše chaotsóndbemama, nÿetscna pochócaye soyëngaca, bueta sóynaca ntšamo chata tbojtsebošcá.

⁷ Pero ntšamo Bëngbe Bëtsabiama ibotatsëmbcá entšángbioye jábuayenama chata chabojapochocá ora, chë uabouana bayá, chë corente bëts

tboicana chaojabocná, chátbioye echántsatsjaye, echantsayënjaná y echantsëbaye.

8 Y chatbe óbana cuerpo, chë corente bëts pueblentša tsáshenañe echanjoquéda, chë chatbe Útabná tmojancrucificá luarentše, y chë bëts pueblo inyetsá juabáyamna nántsemna mo chë Sodoma y Egiptó luaroycá. Chentše endmëna mo chë bëts pueblënga Sodoma y Egiptcá, er chentše chë entsanga yapa bacna soyënga jtsamana.

9 Y unga y tsëntsa tentscuana, chë obanatbe cuerpo mochantsonyaye, nyetsca canye luarentša entsanga, nyetsca cachca buiñe bomna entsanga, ba biyana bomna entsanguentsana y ba mándayëngbentša entsanga; ndoñe quenátslesenciana chata jutabuantsama.

10 Chata bochjóbanama, quem luarentše oyenënga mochanjóyejuaye; tša oyejuayënga mochántsemnama, ndayánaca mochanjénatsëtaye, er ntšamo chë Bëngbe Bëtsabe juabna oyebuambnayata tbojanayancá, tojanma quem luarentše oyenënga puerte chamosufrima.

11 Pero chë unga y tsëntsa te tonjanochnëngo ora, Bëngbe Bëtsá tonjanma chë obanata chábuatayenama; chentšana tbontantsata, y chë monjétsantjeshnënga tša uatjana tonjanëbuache.

12 Chora canye jabuache oyebuambnayana tbonjanuena, celocana mëntsá enjétsëtsëtsnaye: “Moye mašënguata ca.” Y chatna canye jantsetëshiñe tbonjántsjua, y chatbe uayayënga chca monjëtsonyaye.

13 Cachora quem fshantse jabuache tontsanangmëmana, y chë bëts pueblentše

bnětsanentšana cányentše tontsanáshajaye, y canýsěfta uaranga entšanga tmonjanóbana. Chě ainěnga tmonjanoquedanga, tša auatjanáněnga, chě celoca Běngbe Bětsábioye montsanadorana.

¹⁴ ¡Chě inýe uabouana soye quem luare japochócama, mora tocjochněngo, pero betsko chě ústonoye uabouana pochócaye soye echanjóshjango!

Chě ústonoye ángelbe trompetěfjua

¹⁵ Chě ústonoye ángel chabe trompetěfjua tonjanájatěto ora, celoca tša monjétsayebuache, měntšá monjétsichamo:

Ora tocjobuache, Běngbe Utabná y chabe Uámana Uabuayaná Jesucristbe aměndayana quem luarentše chaotsemnama, y chě aměndayana echántsemna nýets tempo y nýetsca tescama ca.

¹⁶ Y chě uta bnětsana y canta bětsějéměnga aměndayěnga, chě chěngbe uámana puestiñe Běngbe Bětsabe delante monjétssetbiamaněnga, tmonjanoshamentšé, fshantsóntscoñe jotsejbénase, y Běngbe Bětsá tmonjanadorá,

¹⁷ měntšá jayaněse:

Běngbe Utabná, Běngbe Bětsá nýets obenana bomná,

aca chě mora cha condmėná y chě tempo cha conjamná cbontsatschuaná,

er nýa mora acbe běts obenánaca soyěnga cochjama, acbe aměndayana jóntšama.

¹⁸ Ba luarentša entšanga ácaftaca tmonjanotšatjayená;

pero chëngaftaca cmojetnama chë uabouana castigo jtsebínýnama te tocjóshjango, chë tempo tmojanóbanëngbiama jayanama tšabá o ndoñe tšabá tmonjëftsemama.

Tonjóshjango chë hora, uacanánana jtatšatayama chë acbiama oservénëngbioye, chë acbe juabna oyebuambnayëngbioye, chë acbe entšángbioye,

y chë acbe uabaina nyetscangbiama más bëts uabainana yomnama juabnayëngbioye, uámanënga y nduámanënga;

y chë tempo tonjóshjango, quem luare pochocayënga jtsapochócyayama ca –chënga tmonjánayana.

¹⁹ Chora, Bëngbe Bëtsabe bëts yebna celoca tonjantëfjo, y choye enjëtsebinýna chë cajontema, ndayëtema yojaninýanýná ntšamo Bëngbe Bëtsá chabe entšángbioye tojanašebuachenacá; y chora enjëtsemna tcuinýënga, tša shauenanana, juesasanana, quem fshantse tontsanangmëmana y bëts cá bëntstá tonjantquécjana.

12

Chë shembása y chë uabouana bayá

¹ Chentšana, canýe bëts soye celoca tonjanonýná entšanga canýe soye jinýanýiyama: canýe shembása, shinýe mo chabe uichëtjoniaca, juashcona chabe shecuatšentša tajsoye, y chabe bestšašifne canýe coronësha bnëtsana uta estrellëngaca.

² Chë shembása ngomamaná enjëtsemna, y chë šešona jónýnama yojëtsobecuama jabuache

enjétsesoye, chë šešona jónýnama cha puerte jasúfriama ibojamna causa.

³ Y chora inýe bëts soye celoca tonjanonýná, entsanga inýe soye jinýanýiyama: canýe uabouana dragón buanganá, canýsëfta bestšašëngaca y bnëtsana tsëtjonëšëngaca y chë bestšašënguiñe enjanábomna canýsëfta coronëshangá.

⁴ Chabe uascuatšëjuaca úngañentšana cánýentse chë estrellatémënga celocana tontsansjojó, y quem fshantsoye chëtémënga tontsanëtsana. Y chë dragón chë šešona jtsebonnama shembásabe delante tonjantsá, chë šešonatémbioye jtsósañama, cha tojonýná ora.

⁵ Chora chë shembása canýe šešona boyabásetema bontsanbomna, nda nýets luarenache entsángbioye yochtsamëndaye mo canýe hierro varëfjaquëcá. Pero chë šešona chábentšana tmontsanjuaná y Bëngbe Bëtsábioye, chabe uámana puestoye tmontsanámbañe.

⁶ Chë shembásana entsanga ndoyena luaroye tontsanachá, Bëngbe Bëtsá canýe luare ibojabopróna choye, chentse saná chamocaredadoma, canýe uaranga y uta patse y chnënguana bnëtsana tentscuana.

⁷ Chentšana celoca canýe entsjanayana enjétsesma: Miguel, chë angelëngbe amëndayá, y chabe angelënga chë dragónaftaca monjétsentsjanaye. Chë dragón y chabe angelënga monjétsatsjanaye,

⁸ pero ndoñe chematanobená jáyëñjanama, y chëngbiana ya ndoñe más luare celoca quentétsesma.

⁹ Chcase, chë uabouana dragón chocana tmon-

tanábocna, chë tempsca mëtscuaye, chë Diablo y Satanás ca uabainá, y chë bëtscá entsángbioye aingñayá; quem fshantsoye cha tmontsantsatše, y chë cha yojanaménda angelëgnaca.

¹⁰ Chora canÿe jabuache oyebuambnayana ce-
loca sënjanuena, mëntšá enjétsichamo:
Chë Bëngbe Bëtsá entsanga játsebacama tempo ya
tonjóshjango.

Mora Bëngbe Bëtsá echanjínÿanÿiye chabe obe-
nana y mándayana,
y chabe Uámana Uabuayaná Jesucristbe obenana
jtsemándayama;
er chë Cristbe delante bëngbe catsátanga mal aque-
dayá ya tmontábocna,
nda nÿets tempo Bëngbe Bëtsabe delante mal en-
janaquedayá.

¹¹ Bëngbe catsátanga cha tmonjayënjaná,
er Cristo, chë mo tmojóba Oveshatemcá,
Bëngbe Bëtsá bacna soyëngama entsanga
cháuaperdonama,
tonjanóbana, chabe buiñe juabuáshanëse,
y chë ndegombre soyëngama chënga
monjanóyebuambnáyeca;
er chëngbe vida chëngbiama ndoñe quenjatámana;
Jesucristo jaserviama jóbanama chënga monjan-
prontana.

¹² ¡Chcasna, celoca corente oyejuayana
chaotsemna,
y tsëngaftanga chë choca oyenëngbeñnaca!
¡Pero tša lastema chë fshantsoca y mar béjayoca
oyenëngbiama,
er chë diablo tsëngaftangbioye tonjástjango, corente
tšatjayá,

er cha entsetátšëmbo ya nÿe batšá yojtšábojamna
chë chábioye mochjacastígama ca! —
enjétsichamo.

¹³ Chë dragón quem fshantsoye tmojt-
santsatšama tonjáninÿe ora, chë šešona
boyabásetema tbonjanëshjango shembásabioye
tbontsanacmé.

¹⁴ Pero uta juatëngmiáša, chë bëts aguilbeshá,
chë shembásabioye tmonjaníyé, chabiamá tmojan-
prontá luaroye chaongüefjoma, entsanga ndoyena
luaroca, chë dragónbentsána bënoca; y chentše en-
jamna chë shembásabioye saná chamuájuatšema,
unga y tsëntsa uatëntscuana.

¹⁵ Chora chë dragón, chabe uayoicana bëts
béjaye tonjanbuashëtjo chë shembásabe stëtsoica,
chaobuama y chabotsambama;

¹⁶ pero quem fshantse chë shembásabioye tbon-
janájabuache, er chë fshantse mo uayašacá ton-
jantëfjo, y chë dragonbe uayoicana béjaye oboc-
niye tontsanobmuánañe.

¹⁷ Y chë dragón chë shembásabioye tondaye
jamana chenatanobená causa, corente cacháftaca
tbonjánetna, y tonjána chë ínÿenga, chë shembásabe
basengcá mondmënënga játsjayama, ntšamo
Bëngbe Bëtsá yomandacá imobedecénënga, y
ntšamo Jesucristo tonjanabuayená ndegombre
soyëngaca sempre imoyenënga.

¹⁸ Y chë dragón chë mar béjaye tsachañe ton-
jantsá.

13

Chë dragón tonjanma, chë mar béjayoca

uabouana bayá chabe obenana chaotsebomnama

¹ Chentšana atše sēnjáninýe, canýe uabouana bayá chē mar bejayoicana tonjánbocna; enjánbomna canýsēfta bestšašēnga y bnētsana tsētjonēšēnga, y chēšēnguiñe bnētsana coronēshangá, y chē bestšašēnguiñe bañe enjétsabemana Bēngbe Bētsabiana contra oyebuambnaye uabaina.

² Chē uabouana bayá sēnjaninýá enjamna mo canýe leopardcá, mo osbe shecuášangaca, y chē uayáshana mo leonbeshacá. Chora chē dragón tonjanma chē uabouana bayá chaotsebomnama chabe obenana, y chabe uámana puesto jtsemándayama, y chabe bēts mando.

³ Canýe chabe bestšašēnguentše enjétsinýna mo jóbanama tētšeniñcá; pero chentše tbontanóbema; y chora quem luarentša nýetsca entšanga ojnanánēnga monjétsamna, y chē uabouana bayábioye montsanēyeunana.

⁴ Y chē dragón montsanadorana, chē uabouana bayábioye obenana tbojánatsetama; y chē uabouana bayábioynaca montsanadorana, mēntšá jayanēse: “Ndocná obenana quenátsbomna quem uabouana bayacá, y ndocná quenátobena chábioye jayēnjanama ca.”

⁵ Chē uabouana bayábioye tbonjanlesenciá corente podesca Bēngbe Bētsabiana chaotsóyebuambnama, y obenana tbonjanatsetá, canta bnētsana y uta shinýēntscuana chaotsemándama.

⁶ Y podesca Bēngbe Bētsabiana tonjánayana, soyēnga chabe contra, chabe bēts yebnama y chē celoca oyenēngbe contra.

7 Chábioynaca tbonjanlesencia chë Bëngbe Bëtsábenga imomnënga játsjayama, jáyëñjanantscuana; y obenana tbonjanatsetá chaotsemándama nÿetsca cachca buiñe bomna entsángbeñe, nÿetsca canÿe entsángbeñe, nÿetsca biyañe bomnëngbeñe, y nÿetsca mándayëngbentša entsángbeñe.

8 Chë uabouana bayá nÿetsca quem luarentša entsanga mochántsadorana. Chë entsanga mondmëna ndëmuanyëngbe uabaina ndoñe yontsábemana, chë Bëngbe Bëtsábioye jëtschuayama mo canÿe oveshatemcá, tojanóbanabe librësañe. Bëngbe Bëtsá quem luare cabá ndëma ora, quem librësañe tojanábema nÿetscanga chë tsabe vida mochjónÿenëngbe uabaina.

9 Chë jouenama obenënga, chamouena.

10 Chë cárceloye jama ibomná, cárceloye bochanjotóca jama;
chë espadějaca jobanamá, espadějaca echanjóbana.

Chíyeca quem luarentše entseyta, chë Bëngbe Bëtsábenga imomnënga padecena soyënguiñe tmojtsemna ora, puerte uantadënga jtsemnana y Bëngbe Bëtsábeñe jtsošbuáchiyana, mo chë Bëngbe Bëtsabe entsangcá.

11 Chentšana inÿe uabouana bayá sënjáninÿe, quem fshantsentsana enjëtsebocana; uta tsëtjonëse mo oveshabešcá enjánbomna, pero mo canÿe dragoncá, mo canÿa Satanásbeyeca mandanacá enjëtsoyebuambnaye.

12 Y enjánama soyënga chë natsana uabouana bayabe nÿets obenánaca, chabe delante. Chë

fshantsentša bayá tonjanma n̄yetsca luarentše oyenēnga chamotsadoránama chē natsana uabouana bayábioye, chē jóbanama tētšeniñe tbontanobemá.

¹³ Cha ba bēts soyēngnaca enjánama chabe obenana entšanga jin̄yan̄iyama, entšangbe delante jamana iñe celocana fshantsoye chaótsatšamnaca.

¹⁴ Y cha tbonjanlesenciá chaoma chabe obenana jin̄yan̄iyama chē natsana uabouana bayabe delante. Chē soyēngaca entšanga tonjanaingñé, y quem luarentša entšanga tonjanēyana can̄ye soye chamopormá, y chē soye cháotsin̄yana mo chē natsana uabouana bayacá, chē espadējaca tētšená enjamná, y chora tšabá enjetsatsmēná.

¹⁵ Y chē in̄ye uabouana bayábioye tmonjanlesenciá obenana chaotsebomnana jamama, chē natsana uabouana bayábioye jadórama entšanga tmonjanma soye vida chaotsebomnana, y chē soye jóyebuambayama chaotsobenámna, y jamama chē chábioye ndoñe tmontsadoránēnga chamóbanama.

¹⁶ Y tonjanma, n̄yetscángbioye, básenga y bētsētsanga, bomnēnga y ndbomnēnga, cachēngbiana trabájayēnga y n̄ye ín̄yabiana n̄yets tempo oservénēnga, catšbioica cucuatšiče o juentsaca chamuín̄yanama.

¹⁷ Y ndocná quenjátanobena ni jiyama, ni jobuámiñama, chē uin̄yanánana ndoñe tontsebomnēse; chē uabouana bayabe uabaina o chē chabe uabainama yomna número.

¹⁸ Chē número jin̄yenamna bētská osertánana jtseytana. Chē becá osertánana bomná cháuin̄yena ntšamo chē uabouana bayabe número iuayancá,

er canye entsabe número endmēna. Chē número endmēna chē chnēnguana patse y chnēnguana bnētsana y chnēnguana.

14

Chē canye patse y canta bnētsana y canta uaranga entsangbe canto

¹ Y más sētsanonjā. Sēnjāninjē, chē Oveshatema, enjētsatsjabna Sión ca uabaina tjoca, y cháftaca monjētsemna canye patse y canta bnētsana y canta uaranga entsanga, y chēngbe juentsaca enjētsabemana chē Oveshatembe y chabe Taitabe uabaina.

² Chora sējanuena celocana canye shauenanana, mo bētscá bėjayēnga y bēts juesasana shauenanancá; y chē shauenanana enjamna mo chē arpēsha uenanayēnga chēngbe arpēshangá tmojtsabuastocá.

³ Chēnga canye tsēm canto montsancánta Bēngbe Bētsabe delante, chē chabe uámana puesto y chē cháftaca canta Ainēnga y chē bētsējémēnga amēndayēngbe natsanentše. Y ndocná quenjátanobena chē canto juatsjínjāna, nje chē canye patse y canta bnētsana y canta uaranga quem luarentšēngbentsana atsebácanēngna aīñe.

⁴ Chēnga monjanmēna chē shembásaftaca ndocna bacna soye tmonjanmēnga, er chēnga imojanenománda chca bacna soyēnga ndoñe ntsamama; chē Oveshatema ndēmoye tojtsá y chēngnaca choye jtsēstonana. Chēnga imojamna chē natsanēnga chē quem luarentša entsanguentše atsebácanēnga jtsemnama, y

chënga atsebácanënga imojtsemna Bëngbe Bëtsá y chë Oveshatema jtsaservénama.

⁵ Chënga ndocna te tmonjanobosteró; ndocná quenátobena jayanama chënga bacna soye tmojanma ca.

Ntsamo chë unga angelënga tmojánayana

⁶ Chentšana inye ángel sënjáninye, tsbanánoca celëjana enjëtsongüefjnaye. Cha enjânbomna canye nyets tempscama oservena buayenana soye, entšángbioye jáuyanama, nyets quem luarentse oyenënga, nyetsca mándayëngbentša entšanga, nyetsca cachca buiñe bomna entšanga, nyetsca biyañe bomnëngbeñe y nyetsca canye entšangbiana.

⁷ Y jabuache mëntšá enjëtsichamo: “¡Bëngbe Bëtsabiana šmochjájua boye cha nyetscangbiana chë más uamaná endmënama, y cha šmochtsatschuanaye, er ya tonjóshjango chë tempo ntsamo entšanga tmojamama tšabá o ndoñe tšabá bëtsemnama cha cháuayanama! ¡Chë celoca y quem luare, chë mar béjaye y nyetsca chë fshantsentšana óbocana béjayënga tojamá šmochtsadorana ca!”

⁸ Chábentšana inye ángel mëntšá enjëtsichamo: “¡Ya bëts castigo, ya bëts castigo chë Babilonia bëts puebloca entšángbeñe echántsemna!, ndëmuanyënga tmojinyanyé ntsamo puerte bacna soyënga shembása o boyabásaftaca jtsamama y inye corente bacna soyëgnaca, y chentšana nyets quem luarentša entšanga mo cach Babilonioquëngcá tmojama. Chë causa, Bëngbe

Bëtsá echanjama chëngbiámnaca chabe uabouana castigo chaotsemnama ca.”

⁹ Chë útatbentsana inÿe ángel jabuache mëntsá enjétsichamo: “Nderado nda chë uabouana bayábioye y chë chábioye jadórama pormana soye tojtsadorana, y tojalesenciá chabe uinÿnanana soye juentsaca o cucuatshiñe chamojajoma,

¹⁰ chánaca bontsemna, chë Bëngbe Bëtsabe uabouana castigo jasúfriana. Entšanga puerte bacna soye tmojamama, Bëngbe Bëtsá puerte tbojetna, y chë causa echanjama chë castigo chëngbeñe chaotsemnama. Y chë uámana angelënga y chë Oveshatembe delante, chë bayá adorayábioye puerte mochanjatsetšená, íñeshe y azúfrecá.

¹¹ Chca chamojtsesufrina ora, becá ngona echantsóbocana, y chë ngona nÿets tempo chca echantsótsjuaye; y chënga, chë uabouana bayá y chábioye jadórama pormana soye adórayënga, y chabe uinÿnanana soye bomnëngbiana, ndocna te chë tsetšanana queochatëjbana ca” –cha enjétsichamo.

¹² Chíyeca quem luarentše entseyta, chë Bëngbe Bëtsabe mandënga obedecënënga y Jesúsbeñe puerte ošbuáchiyana bomnënga, chë Bëngbe Bëtsabe entšanga, padecena soyënguiñe tmojtsemna ora, puerte uantana jtsemnana.

¹³ Chentšana canÿe oyebuambnayana celocana sënjanuena, mëntsá šonjétsatsaye: “Mëntsá mábema: ‘Tša oyejuayënga mochántsemna chë mëntescana mochjóbanënga, Bëngbe Utabnáftaca cánÿiñe mo canÿacá jtsomñëse ca.’ ”

“Aíñe ca” —chë Uamana Espíritu tonjayana—, “chënga ya ndoñe más queochátamna jatrabájana, ni jasúfriana, er chënga tmojama tšabe soyënga Jesús jasérviana, y chë soyëngama chënga tšabe bendicionënga mo uacanancá celoca mochanjóyëngacñe ca.”

Ndayá chë angelënga quem luarentše tmojanatbaná

¹⁴ Chora más sënjáninÿe; sënjáninÿe canÿe fjantse jantšetëshe, y chëshiñe canÿa enjëtsetbemana. Cha enjamna mo canÿe entšacá; chabe bestšašiñe enjanábomna canÿe castellano coronësha, y cucuatšiñe canÿe puerte efsana mëtštá enjétsatbëna.

¹⁵ Chentsana, chë celoca Bëngbe Bëtsabe bëts yebnentšana inÿe ángel tonjánbocna, y jabuache bonjétsatsaye chë jantšetëshiñe tbemanábioye: “¡Acbe mëtštaca machbonja y shajuanënga matbaná, er chë játbanama tempo ya tonjóshjango; chë quem luarentša shajuana ya tonjaboche ca!”

¹⁶ Y chë jantšetëshiñe enjantbemaná chabe mëtštaca quem luariñe tonjánachbonja, y nÿets quem luarentše atbanániñe tonjanoquedá.

¹⁷ Chentsana inÿe ángel chë celoca Bëngbe Bëtsabe bëts yebnentšana tonjánbocna; chánaca canÿe puerte efsana mëtštaca.

¹⁸ Y chë altarentšana inÿe ángel tonjánbocna, chë mando bomná iñesheca castigo entšangbiana jamama; y chë puerte efsana mëtštá bomna ángelbioye jabuache tbonjaniyana: “¡Acbe mëtštaca machbonja y chë fshantsoca nÿetsca uvas betiyeshënguentsä uvasëšangá mátabe, er ya uabochenëšangá entsamna ca!”

19 Y chë ángelna chabe mëtstaca quem luariñe tonjánachbonja, y nyetsca quem luarentša uvasësangá tonjanátabe, y lempe chë juantsëtetjiama luaroye tonjanëtsana. Chë soye entsinÿinÿná ntšamo yochtsemnana Bëngbe Bëtsabe uabouana castigo.

20 Chë uvasësangana, chë bëts pueblentsana chaboye tmonjanantsëtetje, y chë luarentšana tša buiñe tonjanóbocna; tonjanojutjé couayëngbe uayashbenëshantscoñe y mo unga patse kilómetrënga tonjanábuashana.

15

Chë angelënga chë canÿsëfta pochócaye soyëngaca

1 Chentsana, inÿe bëts soye entsanga inÿe soyama jinÿanÿiyama, celoca sënjáninÿe, canÿe puerte bëts soye: canÿsëfta angelënga canÿsëfta pochócaye soyëngaca, chë ústonoye pochócaye soyënga. Chë soyënga chaojtsemnentsana ya ndoñe inÿe pochócaye soye yochántsemna, er chëntscoñe Bëngbe Bëtsá yochjacastíga, lempe ntšamo cha jamama tojanjuabocá.

2 Canÿe mar béjaynaca sënjáninÿe, mo cristalca enjétsinÿna íñeca enájuabniye; y chë béjaye juachaca monjétsatsana chë tšabá tmojanbocnënga, y ni chë uabouana bayá, ni chë chábioye jadórama pormana soye ndoñe tmonjánadoranga, y chë uabouana bayabe uabainama yomna número chëngbeñe chaotsemnana ndoñe tmonjanlesencianga. Nyetscanga chënga monjétsabomna Bëngbe Bëtsá tojanëtsatá arpangá.

³ Chënga, canÿe canto monjëtsecantaye ntšamo Moisés, chë Bëngbe Bëtsabe oservená tojancantacá, y ntšamo chë Oveshatema tojancantacá. Mëntsá monjëtsecantaye:

Puerte bëts soyënga y tšabe soyënga entsemna lempe ntšamo aca tcojanmcá,
 Bëngbe Utabná Bëngbe Bëtsá nÿets obenana bomná;
 lempe ntšamo jtsamëse aca icoyena, acbe bom-inÿiñe puerte tšabe y ndegombre soyënga yomna,
 nÿets luarënguenache entšangbe Rey.

⁴ Bëngbe Utabná, ¿nda nanjájuaboye aca nÿetscangbiana ndoñe más bëtsá condmëna ca,
 o ndoñe cmantsatschuanaye?
 Nÿe aca uamaná condmëna;
 nÿetsca mándayëngbentša entšanga ácbioye mochanjabo,
 ácbentše mochanjoshamentšiye aca jadórama,
 er ntšamo tcojamcá lempe entšángbioye mora tcojinÿanÿé,
 y lempe ntšamo aca tcojamcá tšabá jtsemnana ca —monjëtsecantaye.

⁵ Chca chentšana sënjanontješë y sënjáninÿe chë celoca Bëngbe Bëtsabe bëts yebna tonjantëfjo, chë Bëngbe Bëtsá Moisésbioye tbojaníyë leyënga uajajóntše.

⁶ Y Bëngbe Bëtsabe bëts yebnentšana tmonjánbocna chë canÿsëfta angelënga, chë canÿsëfta pochócaye soyënga uambayënga, uafjantse lino entšëjuangá uabuashinÿinÿanëjuangá

uichětjonēnga, y tēntša castellano uasnanējēngaca cochóntscoñe.

⁷ Chentšana, canya chē canta Ainēnguentšá chē canysēfta angelēngbioye tonjanoyé canysēfta castellano codbenga jútjena chē Bēngbe Bētsabe uabouana castígoca; Bēngbe Bētsá chē nyets tempo y nyetsca tescama vida bomná.

⁸ Chorna, chē Bēngbe Bētsabe bēts yebna celoca becá ngónaca tonjanojutjé, y chē ngona enjétsobocana Bēngbe Bētsábentšana, chabe buash-inyinyanana y obenana jtsinyanyayēse; y Bēngbe Bētsabe bēts yebnoye ndocná quenjátanobena jamashēnguana, chē canysēfta angelēngbe canysēfta pochócaye soyēnga candochnēnguēntscuana.

16

Chē castígoca codbenga

¹ Chentšana, canye jabuache oyebuambnayana sējanuena, chē celoca Bēngbe Bētsabe bēts yebnentšana enjétsobocana, y chē canysēfta angelēngbioye mēntšá enjétsētsētsnaye: “Motsajna y quem canysēfta codbenga, chē Bēngbe Bētsábiocana endóbocana uabouana castígoca, fshantsoca šmochjabuashcja ca.”

² Chora chē natsana ángel tonjána y chabe codbé quem luariñe tonjanbuashcja, y nyetsca entšanga chē uabouana bayabe uinynanana soye bomnēnga y chē chábioye jadórama pormana soye adórayēngbe cuerpiñe bañe bacna nguayanana tonjanóbocna, puerta tsetšénana.

³ Chentšana, chē inye ángel chabe codbé mar béjayoca tonjanbuashcja, y choca búyeshe buiñcá

tontsanóbema, mo canye entsá obanabe buiñcá, y nyetscanga chë mar béjayoca vida bomnënga tmontsanóbana.

⁴ Chora chë inye ángel chabe copbé béjayënguiñe y béjaye obocanënguiñe tonjanbuashcja, y buiñe tontsanobiama.

⁵ Chentsana sënjanuena, chë béjayënguiñe mando bomna ángel mëntsá enjétsichamo:

Aca nyetsca soyënguiñe tšabá amá condmëna, er aca tcojayana chë quem luarentša entsanga chca castigánënga chamotsemnama. Bëngbe Bëtsá, Uamaná, mora chca condmëna y chca conjamna;

⁶ er chënga tmonjama, chë acbe entsanga y acbe juabna oyebuambnayëngbe buiñe chauábuashanama, jtsëbáyëse; y mora tconjama chënga buiñe chamofšema. Nyets mercedo imobuájona chca japásama ca –cha enjétsichamo.

⁷ Altarocánënaca canye oyebuambnayana sënjanuena, mëntsá enjétsichamo: “Aíñe, Bëngbe Utabná, Bëngbe Bëtsá, nyets obenana bomná condmëna, y ntšamo entsanga contsacastigacá, ndegombre y tšabá entsemna ca.”

⁸ Chentsana, chë inye ángel chabe copbé shinÿiñe tonjanbuashcja; chë shinÿe corente tontsanobonÿaná y chíyeca entsángbioye íñeshca tontsanajuinÿé.

⁹ Y nyetscanga uabouancá juinÿnënga tmonjanoquedá; pero chënga ndoñe chemátanbošena bacna soyënga amana jtsajbanana, ni Bëngbe Bëtsabe benache jtishachana, ni chábioye quemëntétsatschuanaye, más chabe contra ba

soyënga montsanichamo; cha nda obenana yobomna chëngbioye chë pochócaye soyënga jíchmuama, chënga chamosufrima.

¹⁰ Chentsana chë inye ángel chabe copbé chë uabouana bayabe uámana puestiñe tonjanbuashcja, y nyets chabe amëndayiñe ibetiñe tonjanoquedá. Chë entsanga bichtaja montsanenójantsnaye, yapa tsetse causa;

¹¹ pero ni chca, chë entsanga chematanajbaná bacna soyënga jtsamana, ndayá chë yapa tsetsama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

¹² Chentsana chë inye ángel chabe copbé chë bëts fshájaye Eufrates ca uabáiniyiñe tonjanbuashcja y chë béjaye tontsanbuashjo, japróntama chë shinye bocanoica luarënguentsá reyënga y chëngbe soldadënga chëjana chámuachnëjnama.

¹³ Atse sënjáninye, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuambnayabe uayoicana tmonjánbocna unga bacna espíritënga; mo sapošëngcá monjétsinÿna.

¹⁴ Chënga monjamna bayëjëngbe espíritënga; bëts soyënga monjánama obenana jinÿanÿiyama, y montsanbocana nyets luarentsa reyënga jáchembuama, chë uámana te, ndayté Bëngbe Bëtsá, chë nyets obenana bomná yochjabo entsangbiamá jabáyanama ntšamo chënga tmojamama, chë te chënga chabe contra chamotsetsjama.

¹⁵ Bëngbe Utabná Jesucristo mëntšá tojayana: “Smochjinÿe, atse nye ndeolpe chanjabo, mo

canÿe atbëbanacá, chabiamana ndocná tontsejuabná ora; chíyeca oyejuayënga mochántsemna atše jabama tmojtseprontanënga, mo nda tojtsefšna y chabe entšayá totsaboprontañacá, nÿe enašá ndoñe chaondëtsemnama, y entšanga chca tmojinÿe ora ndoñe chaondëtsëuatjama ca.”

¹⁶ Y chë bacna espíritëngna chë reyëngbioye tmonjanënatse canÿe luare, hebreuiñe Armagedón ca uabáinoye.

¹⁷ Chentšana, chë ústonoye ángel chabe copbé quem luarentša tsbanánoca tonjanbuashcja, y chë celoca Bëngbe Bëtsabe bëts yebnentša uámana puestentšana canÿe jabuache oyebuambnayana tonjanóbocna, mëntšá enjétsichamo: “¡Chë jopásama enjamna soye ya tocjochnëngo ca!”

¹⁸ Chora enjëtsemna tcuinÿënga, shaue-nanana y juesasanana, y quem luariñe tontsanangmémana, yapa jabuache quem luare tontsanëbanjó causa; quem luarentše entšanga imobinÿna orscana, ndocna te nÿa chca quem luare tontsanëbanjó.

¹⁹ Chë puerte bëts pueblo úngañe tontsanojatá, y nÿets luarentša bëts pueblënga tontsanáshajaye, y Bëngbe Bëtsá tojanenujabó chë puerte bëts pueblama, Babilonia ca uabaina pueblama, chentša entšanga chë uabouana castigo chamotsebomnama, Bëngbe Bëtsá tša tbojánetna causa, tša bacna soyënga chentše tmojanmama. Y chca, chë chëngbe bëts pueblo úngañe tontsanojatá ora, cha chënga tonjanacastigá.

²⁰ Mar béjayoca nÿetsca fshantsënga y quem luarentša nÿetsca tjañe tontsanenatjëmbe.

²¹ Celocana bētsētsa bēntstbenga entšángbeñe tonjantquécjana, chēbenga canta bnētsana kilama más utbenga; y entšanga Bēngbe Bētsabe contra ba soyēnga tmonjánayana, er chēnga tša montsan-sufrina chē bēts pochócaye bēntstá causa, y chē pochócaye bēntstá chēngbiana puerte jabuache castigo enjamnama.

17

Chē puerte bacna vida bomna shembásabe castigo

¹ Canya chē canysēfta angelēnguentšá, chē canysēfta copbenga monjanatbēnēnguentšá, tonjánabo y šonjaniyana: “Mabo; cbochanjinýinýiye ntšamo yochtsemna chē puerte bacna vida bomna shembása, chē bėjayēnguiñe entsetbemanabe castigo.

² Quem luarentša mandadēnga cháftaca puerte bacna soyēnga tmojama, y quem luarentša oyenēnga puerte tmojóyejuanga chē cháftaca bacna soyēnga amama, mo chē bacna vida bomna shembásabe vínoyeca puerte cuafjotmenangá ca.”

³ Chentšana chē ángel, atše chē Uámana Espíritbeyeca corente mandaná jtsemnēse, šonjanánatse entšanga ndoyena luaroye. Choca sēnjáninýe canýe shembása, canýe uabouana buángana bayábeñe enjaquená; chē bayabe cuerpiñe nýētsañe Bēngbe Bētsabiana puerte bacá oyebuambnaye uabaina enjétsabemana, y enjánbomna canysēfta bestšaše y bnētsana tsětjonēse.

4 Chë shembása enjanichëtjona uámana shbuenda uafjatsenga y buángana entsayá, y entsanbotamana castellánoca, uámana botamana ndëtsëtémëngaca y pérlica. Chabe cucuatshiñe canye castellano copbé enjétsatbëna, jútjena puerte uaboyënja soyëngaca, y chë boyabásengaftaca cha tojanma puerte bacna soyëngaca.

5 Y chabe juentsaca canye uabaina enjétsabemana, ndoñe josérta soye, mëntsá: “Chë puerte bëts pueblo Babilonia, tša bacna entsanga chentše, mo chë puerte bacna vida bomna shembásengbe bebmá cuaftsemncá; chentšana tojanóbocna quem luarentša nyetsca puerte uaboyënja soyënga ca.”

6 Atše sënjáninye chë shembása tëmiá, er cha tojanofsé chë Bëngbe Bëtsábenga imojamnëngbe buiñe, ndëmuanyëngbioye tmojanëbaye Jesusbiana oyebuambnaye causa.

Chca sënjáninye ora, tša sënjanenjananá.

7 Chora chë ángel šonjaniyana: “¿Ndáyeca tcojenjaná ca? Atše chochanjauyana ntšamo yojtsayana chë shembása y chë chábioye bontsambá uabouana bayá, chë canysëfta bestšaše bomná y bnëtsana tsëtjonëše; chë soye ndocná quenátstatšëmbo.

8 Chë tconjinye uabouana bayá, tempo chca enjamna, pero mora ya ndoñe. Chë corente bëts tboicana cha echanjesetsjuá, pero lempe pochocaná jtsemnama chca echántsaye. Quem luarentše oyenënga, ndëmuanyëngbe uabaina quem luare jobojátsama orscana ndoñe yonduábemana, chë tšabe vida mochjónyëngbe uabaina iuábemana librëšañe,

chënga mochanjenjnaná, chë bayá chë tempo enjaniyená y mora ya ndoñe, pero cachiñe yochjésabama chamojinýe ora.

9 “Muentse canýe soye entsemna chë chca josértama chamojobenangbiama: chë bayabe canýsëfta bestšaše endmëna canýsëfta tjañe ndayiñe chë shembása entsetbemana; chë bestšašëgnaca mondmëna canýsëfta mandadënga.

10 Chentsana, shachnëngbe amëndayana ya tonjochnëngo, canýa mora entsetbemana jtsamëndayama y chë inýa cabá ndoñe tonjášhango. Y cha chaojášhango ora, ndoñe bënama cha queochaisemánda.

11 Chë tempo enjaniyena uabouana bayá pero mora ya ndoñe, endmëna chë canýsëfta mandadënguentsana inýe mandado, pero chánaca chë inýe canýsëftangcá endmëna y lempe pochocaná jtsemnama entsá.

12 “Chë tconjinýe bnëtsana tsëtjonëse mondmëna bnëtsana mandadënga, jamëndama cabá ndoñe tmonjójayenga; pero básefta tescama cánýiñe chë uabouana bayáftaca, mando mo reyëngcá mochanjóyëngacñe.

13 Quem bnëtsanënga nýetscanga cachcá mochántsejuabnaye, y chë uabouana bayábioye chëngbe obenana y mando mochanjátsetaye.

14 Chë Oveshatembe contra mochántsejtsjanaye; pero chë Oveshatema echantsayëjnaná, er chë Oveshatema endmëna nýetsca amëndayëngbiama chë más uámana Utabná y nýetsca reyëngbiama chë más uámana Rey. Chë bnëtsana mandadënga

cháftaca mochántsestsjanaye ora, cha chentše chabe entšángaftaca cánýiñe echántsemna. Chënga mondmëna chë cha tojáchembo y tojubuáyanënga y chábeñe sempre ošbuáchiyënga ca” –cha šonjaniyana.

¹⁵ Chë ángel mëntsánaca šonjaniyana: “Chë tconjinýe béjayënga, ndayiñe chë bacna vida bomna shembása entsetbemana, mondmëna nýetsca canýe luarentša entšanga, enutanana entšanga, nýetsca biyañe oyebuambnayënga y nýetsca mándayëngbentša entšanga.

¹⁶ Y chë uabouana bayábeñe tcojinýe bnëtsana tsëtjonëse y chë uabouana bayá, chë bacna vida bomna shembásabioye mochantsáboyënja; enašá cachcá mochanjesonýaye; chabe cuerpentša mëntsëna mochantsósañe y íñeshëca mochántsejuinýiye, chaopochocantscuana.

¹⁷ Bëngbe Bëtsá tojama chë bnëtsanënga ainaniñe tša chamotseboše, ntšamo cha yobošcá chamotsamama. Chca, chënga mochanjenóyeunaye chëngbe mando chë uabouana bayábioye jantšabuáchiyana, ntšamo Bëngbe Bëtsá tojayancá chaojopasantscuana.

¹⁸ Chë tconjinýe shembása chë puerta bëts pueblo endmëna, chë ndayentša mandadënga nýets quem luarentša mandadëngbeñe mando mondbomna ca” –cha šonjaniyana.

18

Babilonia japochócamá

¹ Chentšana inýe ángel sënjáninýe, celocana enjétsastjajuana, puerta obenana bomná, y chabe

buashinÿinÿanánaca nÿets quem luariñe entsanbinÿna.

² Chë ángel jabuache mëntsá enjétsichamo:

¡Ya mochantsepochoća, ya mochantsepochoća chë uámana pueblo Babilonia!

¡Chentše tojtsóbema diablëngbe oyeniñe, nÿetsca bacna espíritëngbe oyeniñe,

y ndoñe tšabe y uaboyënja shloftšëngbe oyeniñe!

³ Er nÿetsca quem luariñe mándayëngbentša entsanga puerte bacna soyënga tmojama chentša entsangbe causa,

mo chë bacna vida bomna shembásaftaca bacna soyënga cuafjamcá,

mo puerte cuafjotmenangcá chë bacna vida bomna shembásabe vínoyeca.

Nÿetsca luarënguentša mandadënga puerte bacna soyënga tmojama,

mo chë shembásaftaca bacna soye cuafjamcá,

y quem luarentša obuámnañënga y enënga, bomnënga tmojobiama chentša entsanga yapa crocénana nÿe ndayíñnaca ntsejuabnaycá gástaye causa ca –cha enjétsichamo.

⁴ Chentšana, celocana inÿe oyebuambnayana sënjanuena, mëntsá enjétsichamo:

¡Chë bëts pueblentšana maisebocana!, tšëngaftanga chë atšbe entsanga šmomnënga,

chë chentša entsanga mondbétsama bacna soyënga ndoñe chašmondétsamama,

ni chë chëngbioye japochócama soyënga tšëngaftangbiama cach ndoñe chaondétsemnama.

⁵ Chënga tša bacna soyënga tmojama, tša bëtscă nÿa mo celóntscoñe cuafjoutjecá,
y Bëngbe Bëtsá mora entsejuabná chënga tša puerte bacna soyënga tmojama causa, chë soyëngama jácastigama.

⁶ Ntšamo chentša entšanga ínÿengbiana ndoñe tšabá tmonjamcá,
chë entšangbiámna cachcá chaotsemna;
ntšamo tmojamama, cabá uta soye más cachca soye chëngbiana chaotsemna;
ntšamo chentša entšanga ínÿenga chamosufrima tmojamcá,
chëngnaca cachcá uta soye más chamosufrí.

⁷ Chënga corente jtsenábotamnayana y yapa crocénana nÿe ndayíñnaca ntsejuabnáyca jtsegástayana;
chë causa, chënga entsamna puerte jasúfriama y becá tsetsanana jtsebomnama.

Er chëngbe ainaniñe mëntsá jtsejuabnayana:

“Muentše mo reyëngcá mondëtbíamana.

Viudacá ngménaca ndoñe quemuátsmëna; ton-dayama quemochátssufrina ca.”

⁸ Chíyeca, canÿe ora pochócaye soyënga chëngbiana echanjóshjango:

jóbanama šocanënga, puerte ngménana y jabuache shëntsana,

íñesheca lempe chëngbeñe echántsejuinÿe;

er Bëngbe Bëtsá corente obenana bomná endmëna, Bëngbe Utabná chë chënga chca castigo chamotsebomnama tojayaná ca —cha enjëtsichamo.

⁹ Quem luarentša mandadënga, chentša entšángaftaca puerte bacna soyënga tmojamënga,

y chëngaftaca nÿe ndayíñnaca yapa crocénana, ntsejuabnycá tmojagastanga, mochanjošachna y puerte ngmenánaca mochántsemna, chë bëts pueblo chaojtsangbototjuanentša ngona chamojinÿe ora.

¹⁰ Chentšana bënoca mochanjoquéda antješna, chë uabouana castiguama auatja causa, y chentša entsangbiana mochanjayana:

¡Tša lastema, tša lastema tšëngaftanga chë uámana bëts pueblo, Babilonientše oyenëngbiana, chë tša obenana binÿnentše!

Canÿe ora tšëngaftangbe castigo tojóshjango ca — mochántsíchamo.

¹¹ Chë quem luarentša obuámnañënga y enëngnaca mochanjošachna y ngmenánaca mochántsemna chë pueblentša entsangbiana, er chora ya ndocná queochátsmëna chë chënga tmojúshjango soyënga chamobuámiñama:

¹² tmojúshjango castellano soyënga, midio soyënga, uámana y botamana ndëtšbënga, perlënga, uámana lino y shbuenda uafjatsenga entsayá y sedëjua y uámana uabuángana entsayá; nÿetsca botamana uanguëtše betiyënga, marfíloca pormana soyënga, uámana niñëšëngaca pormana soyënga, bronce soyënga, hierro y marmol soyënga;

¹³ bëtscá canela y inÿe botamana uanguëtše y tamna soyënga, botamana uanguëtše béjayënga, inciense y mirra; vínoye, aceitiye, uámana arn-inÿá, trigo; bayënga ndayánaca uasmëmnyënga, oveshënga, couayënga, cochëshangá y entsanga nÿets tempo nÿe ínÿabiama oservenëngnaca.

¹⁴ Y chë pueblentša entsangbiana mochanjayana:

¡Chë tša cmonjanogúsetana jtsebomnama soyënga,
 mora ya ndoñe quešmátsbomna;
 chë uámana y buashinÿinÿana soyënga y tša bom-
 nana lempe šmojobuetše,
 y ndocna te más cachca soye quešmochátsbomna
 ca!

¹⁵ Chë soyënga enënga, chë bëts pueblentša
 entsángbeyeca bomnënga tmojanobiamënga,
 bënoca mochanjoquéda antješna, chë bëts
 pueblentša entsangbiana tša bëts castiguama
 auatja causa; mochanjošachna, puerte
 ngmenánaca mochántsemna.

¹⁶ Y mëntšá chentša entsangbiana mochan-
 jayana:

¡Tša lastema, tša lastema tsëngaftanga chë uámana
 bëts pueblentše oyenëngbiamal!

Chë enjáninÿna mo canÿe shembasacá, uámana
 lino entsëjua uichëtjoná,

uámana shbuenda uafjatsenga y uabuángana
 entsáyá uichëtjoná,

botamananá castellánoca, perlënga y uámana bota-
 mana ndëtsbéngaca.

¹⁷ ¡Y canÿe ora chabe tša bomnana lempe tojt-
 sopochocá ca! —mochanjayana.

Nÿetsca chë barquënguentša mándayënga,
 chentša entsanga inÿe luaroye ajnënga y chentša
 trabájayënga, y nÿetscanga chë vida onguayiñe
 mar béjayoca trabájayëngnaca, chentšana bënoca
 mochanjoquéda antješna,

¹⁸ y chë bëts pueblo chaojtsangbototjuanentša
 ngona chamojinÿe ora, jabuache mochanjayana:
 “¡Quem uámana bëts pueblécá ndocna inÿe pueblo
 cachcá quenátsmëna ca!”

19 Chca chamojinÿe ora, ngménama bestšašine polvÿshe mochántsenotboto, y mëntšá mochántseyona ošachiyënga y puerte cochtsetšenánënga:

¡Tša lastema, tša lastema tšëngaftanga chë uámana bÿts pueblentše oyenëngbiamal!

Chentša bomnánaca bomnënga tmojanobiama nyetscanga chë mar béjayoca barco bomnënga.

¡Canÿe ora lempe tojtsopochocá ca! –chënga mochántseyona.

Chora chë ángel tonjánayana:

20 ¡Celoca oyenënga móyejuanga chë pueblo chca tojapasama;

y tšëngaftángnaca móyejuanga, Bëngbe Bëtsabe entšanga, Jesucristbe ichmónënga y Bëngbe Bëtsabe juabna oyebuambnayënga, er chca jacastígase, Bëngbe Bëtsá tojama chënga chamosufrima,

ntšamo tšëngaftanga chašmosufrima chënga tmojanmcá ca! –cha tonjánayana.

21 Chentšana, canÿe ángel puerte obenana bomná, canÿe ndëtsbé tonjanatsbaná, mo canÿe bÿts nantsnëbé ndëtsbecá, mar béjayoye tonjanashbuetše y mëntšá tonjánayana:

Mëntšá, nÿe ndeolpe y jabuache, Babilonia chë uámana bÿts pueblo mochántsetsatše, y ndocna te más quem pueblo queochátsmëna.

22 Chentše, ndocna te más quemochátuenana arpangá uabuástoyana, ni cantayana, flautëfjënga y trompetëfjuangá cach ndoñe;

ndocna te más quemochátsmëna obrerënga, ni chë nantsnëbeñe trabájayana quemochátuenana.

23 Chentše, ndocna te más ndocna uajuinÿaněsha
 queochátsbinÿnaye,
 ni casamento fiestentša enbouenanana
 quemochátuenana.

Er chë bēts pueblo chca mochantsepochóca,
 masque chentša obuámnañēnga y enēnga nÿets
 quem luarentše chë más bomnēnga mon-
 jamna,
 y chentša bocjuanánaca nÿetsca luarēnguentša
 entšanga ingñēnēnga monjamna ca —cha
 tonjánayana.

24 Bēngbe Bētsá chca chë bēts pueblentše echan-
 jama, er chentše tmojinÿena chë Bēngbe Bētsabiana
 trabájaye causa tmojanóbanēngbe buiñe; chë chabe
 juabna oyebuambnayēnga, chabe entšanga, y chë
 chábioye oservénama nÿets quem luarentše tmo-
 jtsēbayēngbe buiñe.

19

1 Chentšana celoca sēnjanuena mo
 mallajta entšanga cuaftsayebuachcá, mēntšá
 monjétsichamo:

¡Bēngbe Utabná matschuanga!

Bēngbe Bētsá endmēna nda chabe entšanga tojat-
 sebacá;
 cha puerta uámanana, buashinÿinÿana y mando
 endbomna,

2 er ndayama cha tojayancá ndegombre jtsem-
 nana,
 y ntšamo tšabá chama tojtsemncá.

Cha chë uachuana bacna vida bomna
 shembásabioye tbojacastigá.

Chë shembásabe puerta bacna soyēnga causa,

nÿets luarentša entšágnaca bacna soyënga tmo-
jama.

Chábioye chca jacastígase,

Bëngbe Bëtsá tojama ntšamo jamama ibomere-
cencá,

chábioye oservénënga chë shembásabeyeca
tmojóbana causa ca —chënga monjétsichamo.

³ Y cachiñe mëntsá tmonjánayana:

¡Bëngbe Utabná matschuanga!

¡Chë bëts pueblo japochócama uangbototjuanentša
ngona nÿetsca tescama chca echanjótjuaye
ca!

⁴ Y chora, chë uta bnëtsana y canta
bëtsëjëmënga amëndayënga y chë canta Ainënga
tmonjanoshamentsé, y Bëngbe Bëtsá, chë uámana
tbemanentše enjëtsetbemanabioye tmonjanadorá,
mëntsá jayanëse: “¡Chca chaotsemna! ¡Bëngbe
Utabná matschuanga ca!”

⁵ Y chë uámana puestentšana canÿe oyebuamb-
nayana tonjanóbocna, mëntsá:

Bëngbe Bëtsá matschuanga, nÿetsca chabe os-
ervénënga

y chë nÿetscangbiana cha chë más uamaná
yomnama juabnayënga,

básenga y bëtsétsanga ca.

Chë Oveshatembe casamento fiesta

⁶ Y sënjanuena mo mallajta entšangbe
oyebuambnayancá, mo bëtsá béjaye
cuaftsobonjncá y mo bëts juesasanana
shauenanancá; mëntsá monjétsichamo:

¡Bëngbe Utabná matschuanga!

Er Bëngbe Utabná, Bëngbe Bëtsá nÿets obenana
bomná tojontsé jamándana.

⁷ Puerte móyejuanga y mochjínÿanÿiye

Bëngbe Bëtsá puerte bëtsá y uamaná bétsemnama,
er mora entsemna mo chë Oveshatembe casa-
mento te cuafjoshjangcá;

chabe shema yochjabocná puerte tojtenobotamá;

⁸ tmojalesenciá cha chauatíchëtjo uámana, ndu-
atsenga uafjantse y uabuashinÿinÿana lino
entsáyá.

Chë shema entsinÿinÿná chë Bëngbe Bëtsabe
entsánga;

y chë lino entsáyá jtsichëtjonana entsinÿinÿná
chënga lempe ntšamo tšabá yomncá jtsamëse
imoyena ca —chënga monjétsichamo.

⁹ Chentsana chë ángel šonjaniyana: “Mëntsá
mábema: ‘Oyejuayënga chë Oveshatembe casa-
mento fiestama ófjanënga ca.’ ” Y mëntsánaca
šonjaniyana: “Chca, ndegombre Bëngbe Bëtsabe
palabrënga endmëna ca.”

¹⁰ As chabe shecuatšentše sënjanoshamentsé cha
jadórama, pero cha šonjaniyana: “Ndoñe, átšeftaca
ndoñe chca mátamana, er atše Bëngbe Bëtsabe canÿe
oservená sëndmëna, ntšamo aca condmëncá, y
chë Crístbeyeca acbe catšátanga, ntšamo chabi-
ama motatšëmbcá y chabe ndegombre palabrënga
nÿets tempo imabuayiynanga mondmëncá. Aca
cmontsemna Bëngbe Bëtsá jadórama ca.”

Ndayá Jesús tojanma y tojanayancá, endama
chë Bëngbe Bëtsabe juabna oyebuambnayënga
chëngbe ainaniñe osertánana y añemo
chamotsebomnama, chë soyëngama entšángbioye
jábuayenama.

Chë fjantse couayiñe enjaquená

11 Chora sënjaninÿe celoca atëfjniñe; canÿe fjantse couaye enjëtsemna y chë chábeñe enjaquená enjanabaina “Ntšamo tojašebuachenacá amá” y “Ndegombre oyebuambnayá ca”, er ntšamo tšabá yomncá cha tojanjuabó y tojanma entšángaftaca; y chca chabe uayayëngaftaca monjánentsjanaye.

12 Chabe fšnëbenga mo iñeshcá enjáninÿna, bestšašiniñe ba uabuashinÿinÿana coronëshangá enjanábomna, y canÿe uabaina chábeñe enjanábemana; nÿe cha chë uabaina yojanábuatma.

13 Cha enjanichëtjona buiñeca unëtjona entšayá y chabe uabaina enjamna “Bëngbe Bëtsabe palabra ca”.

14 Y chabe ústonoye monjétsajna mallajta soldadënga celoquënga, nduatsenga uafjantse y uámana lino entšayá uichëtjonënga, fjantse couayënguiñe enjaquenënga.

15 Chë enjëtsebnatsanabe uayoicana enjanóbocana canÿe puerta efsana espadëja, chë Bëngbe Bëtsábeñe ndošbuáchiyënga játatsetšama. Cha puerta obenánaca echántsamëndaye, mo canÿe hierro varëfjaquëcá. Cha echanjama entšángaftaca mo nda uvasëšangá juantsëtetjama tojtsabotajná ora cuafjamcá; y echanjama chënga chamotsebomnama chë puerta uabouana castigo, Bëngbe Bëtsá chë nÿets obenana bomná tbojetna causa.

16 Chabe uabonjaníyañe y chabe mëntjoca canÿe uabaina enjanábemana: “Nÿetsca reyëngbiamá chë más uámana Rey, y nÿetsca amëndayëngbiamá chë más uámana Utabná ca”.

17 Chentsana canye ángel sēnjáninye, shinýiñe enjétsatsana, chē celoca tsbanánoca nyetsca monjanongüefjná shloftšēnga jabuache mēntšá enjétsētsēsnaye: “¡Mabēnga, menefjna chē Bēngbe Bētsá tojaprontá bēts saná jasama;

18 chašmosama reyēngbe mēntšena, soldadēnga amēndayēngbe mēntšena y valente entšangbe mēntšena, couayēnga y chēngbeñe enjaquenēngbe mēntšena, y nyetsca entšangbe mēntšena, cachēngbiama trabájayēnga y nye ínýabiama nyets tempo trabájayēnga, bāsesenga y bētsētsanga ca!”

19 Chora atše sēnjáninye chē uabouana bayá y quem luarentša reyēnga chēngbe soldadēngaftaca tmojánenefjna, chē fjantse couayiñe enjaquená y chabe soldadēngaftaca jéntsjava.

20 Chē uabouana bayá tmonjanotbá, y cháftaca chē Bēngbe Bētsabe ndoñe ndegombre juabna oyebuambnayá, chē bayabe delante ba bēts soyēnga tonjanmá obenana jinýanyiyama; y cha chē soyēngaca tojanaingñé chē uabouana bayabe uinýananana soye chamuayentsjajoma tmojanlesencianga, y chē chábioye jadórama pormana soye adórayēnga. Y chē útatbioyna ainata tmontsanatmetše chē íñesheca uafjajónayoye, chē azufre endējuinýinanentše.

21 Chē ínýēngbioyna tmontsanapochocá chē fjantse couayiñe enjaquenabe uayoicana enjanóbocana espadējaca, y nyetsca shloftšēnga chēngbe mēntšénaca yapa tmontanoshachá.

20

Chē uaranga uata

1 Chentšana canye ángel sējáninýe celocana entsanastjajuana chē corente asentoye tboca llavéjaca, y canye bēts cadenējua entsanētvena.

2 Chē ángel tbontsantbá chē dragónbioye, chē tempsca mētscuaye, chē Diablo y Satanás endméná, y canye uaranga uatama tbontsanbátsēca.

3 Chē corente asentoye tboye tbontsantsatše, chentše tbontsanētame, y chentše bēsáša tsengájašeca tonjaninýnaná, ndotatsēmbcá jatēfjuama ndocná chaondobenama; y chca, chē dragón ndoñe chaondobená jabocnama entsanga jáingñama, chē uaranga uata candochnēnguēntscuana; y chora, básefta tescama chē dragón mochanjētsboshjona.

4 Uámána puestēnga sējáninýe, y chiñe tmonjanotbiamá chē entsanga tšabá o ndoñe tšabá tmonjamama jayanama obenana tmojanóyēngacñēnga. Chē bestšaše jtsēstjanguēse tmojanóbanēngbe espíritēngnaca sējánanýe. Chēnga chca tmojanóbana, Jesús tojánayana soyēnguiñe y chē Bēngbe Bētsabe buayenana soyēnguiñe sempre ošbuáchiye causa. Chēnga ndoñe tmonjanadorá ni chē uabouana bayá, ni chē chábioye jadórama pormána soye, y ndoñe tmonjanlesenciá chē bayabe uinýnanana soye juentsaca o cucuatšínē chamuayentsjajoma. Y sējáninýe chēngna tmontanayena y Crísoftaca canye uaranga uatama montsanmánda.

5 Chē entsanga mondmēna chē natsanēnga jtayenama, pero chē tempo chē inýe obanēnga ndoñe chemēntétanayena, ndayá nýe chē canye uaranga uata chentšana.

⁶ ¡Oyejuayënga y Bëngbe Bëtsabe entšanga, chë tmojtanayënnga chë obanënga chámuatayenama Bëngbe Bëtsá tojanma ora! Chënga ndoñe quenátamna chë nÿetsca tescama castigo jtsebomnana, ndayá Bëngbe Bëtsá y Crístbioye mo bachnangcá chënga mochántseservena, y Crístoftaca chë uaranga uatama mochántsemandaye.

Satanás japochócamá

⁷ Chë uaranga uata chaojochnëngo ora, Satanás chabe utámenocana mochanjétsboshjona;

⁸ y cha echanjábocna nÿets luarentša entšángbioye, chë Bëngbe Bëtsabe soyëngama contra imomnéngbioye jáingñama, chë ntšamo Bëngbe Bëtsabe contra Gog y Magog tempo ibojamncá imomnénga. Satanás, chë entšanga echanjáchembo Bëngbe Bëtsabe contra jéntsjava, y tša chëftanga cha echanjáchembo, nÿa mo chë mar béjaye chënyoca cascajá mochántsemna.

⁹ Chënga nÿetscanga nÿets luarëjana mochanjátsjua, y chë Bëngbe Bëtsabe entšanga oyenentše y chabe bonshana entšangbe bëts pueblo shëconana mochanjotsaye. Pero celocana iñe echanjatquécjana y chë Bëngbe Bëtsabe contra imomnénga lempe echántsa juinÿe.

¹⁰ Y Satanás, chë aingñayá, mochántsatmetše chë iñeshe y azúfreca uafjajónayoye, ndayentše chë uabouana bayá y chë Bëngbe Bëtsabe ndoñe ndegombre juabna oyebuambnayá tmontsanatmetše. Chentše bëts castigo nÿets tempo, bnëté y ibeta mochanjasufrina.

Chë obanëngbiama tmonjánayana ntšamo chëngaftaca jamama yojtsemnana

11 Chentšana sĕnjĕninĕ canĕ bĕts uĕmana fĕantse puesto jamĕndama y nda chiĕne enĕtsetbemanĕ. Celoca y quem luare chabe delante lempe tonĕanenatĕmba, y ndĕcĕntšĕ mĕs chenatanobinĕnĕ.

12 Y chĕ obanĕnga sĕnjĕnanĕ, bĕtsĕtsanga y bĕsesenga, chĕ uĕmana puestentšĕ natsanoica monĕtsatsana; y chĕ librĕsangĕ tmonĕanĕtĕfĕo, y inĕ librĕšanaca, ndĕmuanĕyenga nĕyetsca tescama tšabe vida mochĕjĕnĕyĕngbe uabaina uabemana librĕša. Chĕ obanĕngbiama tmonĕĕnĕyana ntšamo chĕngaftaca jamama yojtsemnana, cachĕnga vida imojĕbomna ora ntšamo tmoĕĕftsema soyĕngaca, ntšamo chĕ librĕsangaĕ yoĕanabemancĕ.

13 Chĕ mar bĕjayoye tmoĕanĕobanĕnga choicana tmontanbocna, y chĕ obanĕnga tmoĕanoquedanga luarĕnguentšĕna tmontanbocna, y cada cĕnĕyĕbiama tmonĕĕnĕyana ntšamo chĕftaca jamama yojtsemnana, cachĕnga vida imojĕbomna ora ntšamo tmoĕĕftsema soyĕngaca.

14 Chentšana ya ndĕne mĕs obenana quĕntĕtsemna entšanga chamĕobanama chaomama, mo chĕ obenana chĕ ĩĕsheca uafĕajĕnĕyoye cuafĕtsĕtsĕncĕ; quem ĩĕsheca uafĕajĕnĕyoye endmĕna chĕ nĕyetsca tescama castigo jtsebomnama luare; chĕ choca castigĕnĕnga jtŕsamnama yojtŕsamnĕngbiama entsemna mo chĕnga cachiĕne cuafĕjatobancĕ;

15 y ndĕmuanĕyĕngbe uabaina chĕ tšabe vida mochĕjĕnĕyĕngbe uabaina iuĕbemana librĕšaĕ ndĕne yonĕanabemana, chĕ ĩĕsheca uafĕajĕnĕyoye tmonsanatmetšĕ.

21

Celoca tsmiñe y fshantse tsmiñe

¹ Chentšana atše sēnjáninýe canýe celoca tsmiñe y canýe fshantse tsmiñe, ndoñe ntšamo tempo enjamncá, er chē tempo enjamna celoca y fshantse chora ya ndoñe quentétsemna, y chē mar bėjaye chora cach tondaye.

² Sēnjáninýe chē “uámana ca” uabaina bēts pueblo, chē tsēm bēts pueblo Jerusalén, Bēngbe Bētsábiocana celocana enjétsostjajuana, puerte botamaniñe, mo canýe shembása puerte botamananacá, chabe boyá jábocnabiana.

³ Y chora canýe jabuache oyebuambnayana Bēngbe Bētsabe uámana puestentšana sēnjanuena, mēntšá: “Mouena. Bēngbe Bētsá entšángaftaca echántsemna y cha chēngbeñe echantsiyena. Chēnga chabe entšanga mochántsemna, cach Bēngbe Bētsá chēngaftaca echántsemna, y cha chēngbe Bētsá echántsemna.

⁴ Cha echanjama chēnga ndocna te más ngménēnga chamondétsemnama, y ndoñe más chamondóbanama, ndoñe más chamondošachema, ni ngménaca ndoñe chamondétsóyebuambnama y ndoñe más tsetšanana chamondétsebomnama; er ntšamo chēnga entšangcá fshantsoca tempo imojéftsiyena ora enjamncá, chora ya ndoñe chca queochátsmēna ca.”

⁵ Chē uámana puestentše enjantbemaná šonjaniyana: “Atše lempe mo tsēm soyēngcá sēndbama ca.” Y mēntšánaca tonjánayana: “Chē soyēnga mábema, er chē palabrenga endmēna

ntšamo ndegombre yomncá, y nýetscanga mondobena chiñe corente jtsošbuáchiyana ca.”

6 Chentšana šonjaniyana: “Lempe tonjochñengo. Atše sëndmëna chë nýetsca soyënga bojatšayá y pochocayá, chë natsaná y chë ustonoyá. Mo nda tša uajuendayana tojtsebomná canýe béjaye fshantsiñe obocanentšana cuafjofšecá, cachcá nda tša tojtseboše atšbe soyënga jtsebomnama, atše chanjama cha chë soyënga chaotsebomnama, y chë nýetsca tescama yomna tšabe vídnaca, chca jtsebomnama chábioye tondaye ntsotjañcá.

7 Nda nýetsca soyënguentšana tšabá chaojabocná mo ayëñjanayacá, lempe echanjóyëngacñe ntšamo atšbe entšángbioye jatšatayama tijašebuachenacá, y atše chabe Bëtsá chántsemna y cha atšbe uaquiñá.

8 Pero chë auatja causa Crístbioye ndoñe mondëservénënga, chábeñe ndošbuáchiyënga, chë bacna soyënga causa Bëngbe Bëtsabiamna puerte uaboyëñjanënga imomnënga, chë ínýëngbioye obánayënga, chë shembása o boyabásaftaca bacna soye amënga, chë bocjuana soyënga amënga, chë soyënga adórayënga diosënga yomna ca jtsejuabnayëse, y nýetscanga bosterënga imomnëngbiamna, chënga entsamna chë iñesheca uafjónayoca jasúfriana, chë azufre yojuínýinýanentše. Chentše puerte castigánënga sempre mochanjëftsemna, mo uta soyama cuafjobancá ca.”

Chë tsëm bëts pueblo Jerusalén

9 Chentšana canýa chë angelënguentšá, chë canýsëfta copbenga bomnënga jútjena

chë canÿsëfta ústonoye pochócaye soyëngaca, átsbioye tonjánabo y šonjaniyana: “Mabo, cbochanjinÿinÿiye chë tojobouamá shembása, chë Oveshatembe shema ca.”

¹⁰ Y atše chë Uámana Espíritoftaca corente mandaná jtsemnëse, chë ángel šonjanánatse canÿe bëts y tsbanana tjoye, y šonjaninÿinÿé chë tsëm bëts pueblo Jerusalén, chë “uámana ca” uabaina pueblo, celocana Bëngbe Bëtsábicana enjétsostjajuana.

¹¹ Chë bëts pueblo enjétsebuashinÿinÿana Bëngbe Bëtsabe buashinÿinÿanáca; enjétsebuashinÿinÿana mo canÿe uámana botamana ndëtsbecá, mo jaspe ndëtsbecá, pero mo cristalca tëshínÿniñe.

¹² Chë bëts pueblo shéconana canÿe bëts y tsbanana tapiëse enjamna, chë tapiësiñe bnëtsana uta bëshashangá y cada bëshashentse canÿe ángel, y chë bëshashangañe enjanábemana chë Israeloca bnëtsana uta bëts pamílangbe uabaina.

¹³ Shinÿe bocanoica unga bëshashangá, shinÿe uenatjëmbambanoica ungashá, tsjuanoica unga bëshashangá, y tsmanoica ungashá.

¹⁴ Chë tapiëse enjanécuatjona bnëtsana uta ndëtsbenguiñe, y chëbenguiñe enjanábemana Jesucristo chë Oveshatembe bnëtsana uta ichmónëngbe uabaina.

¹⁵ Chë ángel átseftaca oyebuambnayá canÿe castellano juinÿnanëšëfja enjánatbëna jamedídama chë bëts pueblo, chentša bëshashangá y chentša tapiëse.

¹⁶ Chë bëts pueblo cach medida enjánbomna nÿets cantoica, cach medida tëntšoye y nÿanëjoye. Chë ángel chabe juinÿnanëšëfjaca chë bëts pueblo

tonjanmedidá: enjánbomna uta uaranga y uta patse kilómetrënga; tëntsoye, tsbanánoye y nyanëjoye cach medida enjánbomna.

17 Chentsana chë tapiëse tonjanmedidá, enjánbomna chnënguana bnëtsana y shachna metrënga; ntšamo entšanga chca soyënga jamedidama mondëtatšëmbcá chë ángel tonjanmedidá.

18 Chë tapiëse enjanpormana jaspe ndëtsbeca, y chë bëts pueblo ena castellánoca, tša chca nya mo cristalca tëshínyniñe enjáninyna.

19 Chë ndëtsbenga ndayiñe chë tapiëse enjanëcuatjona enjánbotamanana nyetsca uámana botamana ndëtsbéngaca: canyëbé jaspe ndëtsbeca, chë inyëbé zafíroca, chë inyëbé ágata ndëtsbeca, chë inyëbé esmeráldaca,

20 chë inyëbé ónice ndëtsbeca, chë inyëbé cornalina ndëtsbeca, chë inyëbé crisólito ndëtsbeca, chë inyëbé berilo ndëtsbeca, chë inyëbé topácioca, chë inyëbé crisoprasa ndëtsbeca, chë inyëbé jacíntoca y chë inyëbena amatista ndëtsbeca.

21 Chë bnëtsana uta bëshashangá enjuamna bnëtsana uta perlënga; cada bësháša nye canye pérlica uapormanëshá. Y chë más bëts tsášhenëjana enjamna ena castellánoca; mo cristalca tëshínyniñe enjáninyna.

22 Chë bëts pueblentše ndocna Bëngbe Bëtsabe bëts yebna chiyátaninye, er Bëngbe Utabná, chë Bëngbe Bëtsá nyets obenana bomná y chë Oveshatema chentše bonjamna, y chata nyetscangbiana chë bëts pueblentše ndayéntšnaca adoránata bonjëtsemna.

23 Chë bëts pueblentše ndoñe quenjatsiyta shinÿe o juashcona chaotsebínÿnaye, er Bëngbe Bëtsabe buashinÿinÿanana chentše enjëtsebinÿnaye, y chë Oveshatembe buashinÿinÿanana mo uajuinÿanëshacá enjamna chë bëts pueblama.

24 Chentša binÿnayánaca, entšanga nÿetsca mándayëngbentše mochantsiyena, y quem luarentša mandadënga chëngbe uámana y bëts soyënga chë bëts puebloye mochanjiyëbo.

25 Chë bëts pueblentša bësashangá ndocna te quemochtëtatame, y chentše ndocna ora ibeta queochátsmäna.

26 Chë bëts puebloye mochanjiyëbo chë nÿetsca luarënguentša entšangbe uámana y bëts soyënga, y chë nÿetsca luarënguentša entšángbeñe bëtsëtsanga y uámanënga iuabiamná soyëngnaca.

27 Pero ndocna te queochatómashëngo ndayánaca, y chë soye chaotsama entšanga ndoñe tšábenga chamotsemnama Bëngbe Bëtsá jadórama; ni ndocná queochátamashëngo, Bëngbe Bëtsabiana nÿa tondayama ogustana soyënga amá o ínÿengbioye jáingñama soyënga amá. Choye mochanjámashjna nÿe chë ndëmuanÿengbe uabaina yojtsábemana chë Oveshatembe librësañe, chë nÿetsca tescama tšabe vida mochjónÿenëngbe uabaina uábemanentše.

22

1 Chë ángel šonjaninÿinÿé chë enjanobëjna béjaye vida bomniye. Chë búyeshe enjamna ndëtsenguiye y tëshínÿniye mo cristalca. Enjanóbocana chë Bëngbe Bëtsá y chë Oveshatembe uámana puestocana,

2 y chë más bëts tsashená tsëntsajana enjanobëjna. Chë fshajayentša catoica lado enjanójuajna betiyeshënga chë nyetsca tescama yomna tšabe vida jtsebomnama, canye uatiñe bnëtsana uta soye jashájonana, canye cada shinye; chë betiyeshentša tsbuanáchënga josérviana nyetsca mándayëngbentša entsanga jáshnama.

3 Choca ndocna soye queochátsmëna chë ndayama Bëngbe Bëtsá tojayana ndoñe tšabá yondmëna ca, y ndaye bacna soye japásama chaotsemna soye. Chë Bëngbe Bëtsá y chë Oveshatembe uámana puesto chë bëts pueblentše echántsemna, y chatbe oservénënga mochántsadorana.

4 Chënga mochanjinye Bëngbe Bëtsabe jubiá, y chabe uabaina chëngbe juentsaca mochantsambaye.

5 Chentše ndocna ora ibeta queochátsmëna, y chentša oyenënga ndoñe queochátëjaboto canye uajuinyanësha o shinye chaotsebínynaye, er Bëngbe Bëtsá Bëngbe Utabnabe buashinjinyanana chëngbiana echantsebínynaye, y chënga mochántsemna mo reyëngcá uámanënga, y Bëngbe Bëtsáftaca nyetsca tescama mochántsemandaye.

Jesucristo jésabama entsobeco

6 Chentšana chë ángel šonjaniana: “Quem palabrenga endmëna ntšamo ndegombre yomncá, y nyetscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oyebuambnayënga, chëngbe ainaniñe osertánana y añemo chamotsebomnama jóyebuambayama,

chabe ángel tbojichmó chabe oservénëngbioye jinÿanÿiyama ndayá betscó yojtsemna jopásama ca.”

⁷ Chora Jesús tonjánayana: “Mouena. ¡Atše cachiñe betscó chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyebuambana soye tojoyeuná, chë ndayama quem librëšañe entsábemana ca.”

⁸ Atše Juan, chë soyënga sënjanuena y sënjáninÿe. Y chca sënjanuena y sënjaninÿentsána, chë chca šonjaninÿinÿé ángelbe delante atše sënjanoshamentšé, cha jadórama.

⁹ Pero cha šonjaniyana: “Ndoñe, átšeftaca ndoñe chca mátamana, er atše canÿe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catšátanga, chë Bëngbe Bëtsabe juabna oyebuambnayënga y nÿetscanga chë ndayá quem librëšañe endayanama tmojóyeunanga mondmëncá. Aca cmontsemna Bëngbe Bëtsá jadórama ca.”

¹⁰ Chora mëntsánaca šonjaniyana: “Ndoñe mo iytëmencá catjáboshjona ndayá quem librëšañe entsabemancá, chë ndegombre jochnënguama soyënga, er chca jopásama chë tempo ya entsobeco.

¹¹ Cachcá monÿá chë bacna entsá bacna soyënga chaotsama; chë puerte bacna soyënguiñe jtsiyenama bošá, cachca soyënga chaotsama; pero chë tšábiana ntšamo tšabá yomncá chaotsama, y chë Bëngbe Bëtsabe entsá, nÿets tempo nÿets ainánaca chábioye chabotseservena ca” —cha šonjaniyana.

¹² Chora Jesús cachiñe tonjánayana: “Mouena. Atše quem luaroye betscó chanjésabo, y

átseftaca chanjiyëbo chë uacanana soye, y cada ona tsëngaftanguentsábioye chanjoyiye ndayá tojamama ntšamo tbojtsomerecencá.

¹³ Atše sëndmëna chë nyetsca soyënga bojatšayá y pochocayá, chë natsaná y ustonoyá, chë ndábeyeca y ndabiana lempa yomna ca” –šonjaniyana.

¹⁴ Oyejuayënga chë bacna soyëngama perdonánënga imojtsemnënga, mo chënga chëngbe entsayá botamana cuaftsaboshabecá. Chca chënga mochantsobena chë nyetsca tescama yomna tsabe vida jtsebonnama uacanánana jashjáchama, mo chë nyetsca tescama yomna tsabe vida jtsebonnama betiyeshentsana cuaftsescá, y mochanjobenaye chë tsëm bëts pueblöye bësásajana tsabá jamashjnana.

¹⁵ Pero ndoñe quemochatobenaye jamashjnana chë ba ndoñe tsabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë ínÿenga obánayënga, chë soyënga adórayënga diosënga yomna ca jtsejuabnayëse, y nyetscanga chë bostero soyënga ogusetánënga y chca jtsamëse oyenënga.

¹⁶ Chora Jesús cachiñe tonjánayana: “Atše Jesús, atšbe ángel tijichmó chë ntšamo atše sëntsejuabnacá ndayenache ošbuachiyëngcá enefjuanëngbioye lempa chámabuayenama. Atše sëndmëna chë Rey Davidbentsana Entšá. Atše sëndmëna mo chë bínÿanoye puerte bínÿnaye estrellcá ca.”

¹⁷ Chë Uámana Espíritu y chë Oveshatembe shema bondbétsichamo: “¡Mabo ca!” Y nda chca chaojouená cháuyana: “¡Mabo ca!” Y mo nda tsá uajuendayana tojtsebonna, tojabo y bëtscá béjaye

cuafjofšecá, cachcá nda tša tojtseboše Jesube soyënga jtsebomnama, chábioye chaobeconá y cha echanjama chë soyënga cha chaotsebomnama y chë nyetsca tescama yomna tšabe vídnaca, chca jtsebomnama tondaye ntsotjañcá.

¹⁸ Nyetscanga ntšamo quem librëšaňe entsabemancá, chë ndegombre echanjopásama chamojouenëngbioye šcuabuayená. Nderado nda chë soyëngama más chaojaboté, Bëngbe Bëtsá echanjama cha chaosufrí chë quem librëšaňe entsábemana pochócaye soyënga.

¹⁹ Y nderado nda ntšamo quem librëšaňe entsabemancá, chë ndegombre echanjopásama soyënguiňe ndayánaca tojajuaná, Bëngbe Bëtsá chábioye bochantsebojuána ntšamo chabiamana yomncá chë nyetsca tescama yomna tšabe vida jtsebomnama betiyeshentsana y chë tsëm bëts pueblentsana, chë ndayama quem librëšaňe entsábemana.

²⁰ Quem soyënga oyebuambnayá, chë lempe ndegombre echantsemnama tonjayaná, atše, Jesús sentsichamo: “Aíňe, betsco chanjésabo ca.”

Chca chaotsemna. ¡Cochjabo, Bëngbe Utabná Jesús!

²¹ Bëngbe Utabná Jesús chaoma tšabe bendicionënga tšëngaftangbeňe chaotsemnama.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files
dated 29 Jan 2022
19104c0e-9046-5ff3-82fb-eb838c88dcf9